

# ማርቆስ ፩ ዓ.ፌ.ዳ ዩሱፍ ኪሪስቶስ ዋንጌላ ጋሳ ቆፋ

ማርቆስ ዋንጌላይ፡ «ሃይሲ ያሳ ናዓ ዩሱስ ኪሪስቶስ ዋንጌላ ደሜላ» ጊሼ ኮይሮ ደሜሰ፡ ሃ ዋንጌላን ዩሱሲ ኦሶ አሰኔ ማታ አዋ ገዲዲ ሸቁሰ፡ ኢያ ማታይ ኢያ ቲሚርቲያን፡ ቱና አያና ቦላ ደዒያ ዋልቃኔ አሳ ናጋራፔ ማሬይሳን ቆንጨሰ፡ ዩሱሲ፡ «ታኒ፡ አሳ ናጋራ አይሌቴላፌ ኬሳናው ታ ዴዑዋ አላዳ ኢማናው ዩዳ አሳ ናዓ» ያጊዲ ባ ዶናን ሃሳዩሰ፡

ማርቆስ ዩሱፍ ታሪኪያ ሱሬ ኦንኒኔ ዋልቁ ኩሚዳ ኦንኒ ኦዲሰ፡ ማርቆስ ዩሱፍ ቃላኔ ቲሚርቲያ ገደናሽን ኢ አላዳ ማላሊሲያ ኦሶታ ባይራዩዲ ኦዳሰ፡ ማርቆስ ፩ ማቂያ ዮሃንሳ ታሪኪያ፡ ዩሱፍ ደንቃቲያኔ ኢያ ፓጩቴላ ቃንላን ኦዲ ሲሚዲ፡ ዩሱፍ ቲሚርቲያኔ ኢያ ፓሱዋ ዳልጊሲዲ ኦዳሰ፡ አቂ አቂ ቢሽን ዩሱፍ ታማሬቲ ዩሱፍ ሎይሊዲ ኤሪ ኤሪ ቢዶሶና፡ ሽን ዩሱፍ ኢዳይሳቲ አላዲ ኢዳሽ ኢዳሽ ቢዶሶና፡ ዉርሱላ ሽምፖቲ ዩሱፍ ዴዖን ዉርሱላ ሳሚንታን ፖሌቲዳ ኦሶታባ ኦዶሶና፡ ሃሳቲካ ኢያ ካቂቴላኔ ኢያ ዴንዲዋባ ኦዶሶና፡

## ማርቆስ ዋንጌላ ኣይፌ ቆፋታ

- ዋንጌላ ደሜላ 1:1-13
- ዩሱሲ ጋሊላን ባ ኦሱዋ ኦይኪዳይሳ 1:14-9:50
- ዩሱሲ ዩሩሳላሚን ኦላዳ ኦሱዋ 10:1-52
- ዉርሱላ ሳሚንታ ዩሩሳላሚ ሄራን 11:1-15:47
- ዩሱፍ ሃይቆፔ ዴንዲዋ 16:1-8
- ሃይቆፔ ዴንዲዳ ጎዳ ቆንጨኣኔ ሳሎ ኬሳ 16:9-20

፩ ማቂያ ዮሃንሲ ኦን ጊጊሴሰ  
(ማቶ 3:1-12፤ ሉቃ 3:1-18፤ ዮሃ 1:19-28)  
1 ሃይሲ ያሳ ናዓ ዩሱስ ኪሪስቶስ ዋንጌላ ደሜላ፡፡ 2 ናቢያ አሳያሲ ፩ ዓ.ፌ.ዳ ማፃፋን ያሳይ፡  
«ሄኮ፡ ታኒ ታ ኪታንቹዋ  
ኔፔ ሲንሴ ዩዳና፡፡  
ኢ ኔ ኦጊያ ጊጊሳና፡፡

3 ኢሶይ ባዘ ጊደን ባ ቃላ ቶቁ ኦሴዲ፥  
 ረጎዳ ኦጊያ ገቢሲቴ፤  
 ኢ ሃሙታና ሆርጋ  
 ኢያው ሱሪሲቴ ገሰ »  
 ያጌሰ።

4 ፃማቂያ ዮሃንሲ አሳ ፃማቂሽ፥ «ሂንቴ ናጋራፔ ሰሚዲ ፃማቂቴቴ፤ ያሳይ ሂንቴ ናጋራ አቶ ጋና» ያገዲ ቃላ ኦዲሽ ባዘ ቢታፊ ዩሰ። 5 ዩሁዳ ቢታን ዴዊያ አሳይ ኡባይኔ ዩሩሳላሜ ካታማ አሳ ኡባይ ዮሃንሳኮ ዮሶና። ባንታ ናጋራ ፓዊን፥ ዮሃንሲ ኤንታ ዮርዳኖሴ ሻፋን ፃማቂሰ።

6 ዮሃንሲ ገማሌ ኢኪሴፔ ዳዳቲዳ አፊላ ማዔሰ። ባ ፃሳን ዳፎ ዳንጨሰ፤ ቃሲ ቦሌኔ ዳጌራ ኤሲ ሜሰ። 7 ዮሃንሲ ቃላ ኦዲሽ፥ «ታፔ ጉዬራ ዳሮ ሚኔይሲ ዩሰ። ሃሪ አቶሺን፥ ታኒ ኢያ ጫማ ዎዶሩዎ ሆካዳ ቢላናው ቤሲኬ። 8 ታኒ ሂንቴና ሃላን ፃማቂይሰ፥ ሺን ኢ ሂንቴና ጌሻ ኢያናን ፃማቂና» ያገሰ።

**ዩሱሳ ፓጩቴሳ**  
 (ማቶ 3:13-17፤ 4:1-11፤ ሉቃ 3:21-22፤ 4:1-13)

9 ዩሱሲ ሄ ዎዴ ጋሊላ ቢታን ዴዊያ ናዚሬቴ ካታማፔ ዩን፥ ዮሃንሲ ዮርዳኖሴ ሻፋን ኢያ ፃማቂሰ። 10 ዩሱሲ ሃላፊ ኬያ ዎዴ ሳሎይ ዶዬቲን፥ ጌሻ ኢያናይ ባ ቦላ ሆሌዳ ዎዲሺን ቤዒሰ። 11 ቃሲ ሳሎፔ፥ «ታኒ ዶሲያ ታ ናዓይ ኔና፤ ታ ኔናን ኡፋይታይሰ» ያገያ ቃላይ ዩሰ።

12 ኢራ ጌሻ ኢያናይ ዩሱሳ ባዘ ቢታ ኤፊሰ። 13 ዩሱሲ ባዘ ቢታን ፃላሄን ፓጩቴሽ ኦይታሙ ጋላሰ ጋምዒሰ። ደዓታራ ዴዒሰ፥ ሺን ኪታንቸቲ ዩዲ ኢያ ማዲዶሶና።

**ዩሱሲ ሞሎ ኦይኪያ ኦይዲ አሳታ ፃገሰ**  
 (ማቶ 4:12-22፤ ሉቃ 4:14-15፤ 5:1-11)

14 ዮሃንሲ ቃሽቴዳፔ ጉዬ ዩሱሲ ያሳ ካዎቴላ ዎንጌላ ኦዲሽ ጋሊላ ቢታ ቢሰ። 15 ያን፥ «ዎዴይ ጋኪሰ፤ ያሳ ካዎቴላይ ማታቲሰ። ሂንቴ ናጋራፔ ሰሚዲ፥ ዎንጌላን አማኒቴ» ያገሰ።

16 ዩሱሲ ጋሊላ አባ ማታራ ኦዲሽ፥ ሞሎ ኦይኪያ፥ ሲሞናኔ ኢያ አሻ ኢንዲሪያሳ፥ ባንታ ገቲያ አባን ዩጌይሳታ ቤዒሰ። 17 ኤንታኮ፥ «ታና ካሊቴ፤ ታኒ ሂንቴና ኣሴ ኦይሉ ታማርሳና»

---

1:3 ኢሳ 40:3    1:6 2ካዎ 1:8    1:11 ሜዴ 22:2፤ ማዘ 2:7፤ ኢሳ 42:1፤ ማቶ 3:17፤ 12:18፤ ማር 9:7፤ ሉቃ 3:22    1:15 ማቶ 3:2

ያገለግሉ። 18 ኤንቲ ሶሁዋራ ባንታ ገቲያ ዬጊ ኣገዲ ዬሱሳ ካሊደሶና።

19 ዬሱሱ ጉሌ ሰንሐ ቢዲ፥ ናምዑ ኢሻታ ዛብዲዮሳ ናይታ፥ ያይቆባኔ ዮሃንሳ ዋሳሉዋ ገደን ባንታ ገቲያ ገገሴይሳታ ቤዒሰ።

20 ኢ ኤንታ ቤዒዳ ሜላ ጭገሰ። ኤንቲ ባንታ ኣዋ ዛብዲዮሳ፥ ኢያ ኦሳንቸታራ ዋሳሉዋ ገደን ዬጊ ኣገዲ ዬሱሳ ካሊዲ ቢደሶና።

**ቱና ኣያናይ ኦይኪዳ ኡራይ ፓዲሰ (ሉቃ 4:31-37)**

21 ኤንቲ ቁፊርናሆሜ ካታማ ጌሊደሶና። ሳምባቲ ጌሊዳ ሜላ ዬሱሱ ኤሌሲዲ ኣይሁዳ ዋሳ ኩሌ ጌሊዲ ታማርሶ ኦይኪሰ።

22 ማታራ ዳዒያ ኣሳዳ ታማርሴሲፔ ኣቲን ሂጌ ኣሰታማሬታላ ታማርሶና ገሾ ኣሳይ ኢያ ቲሚርቲያን ማላሌቲደሶና።

23 ሄ ዋዳ ቱና ኣያናይ ኦይኪዳ ኢሰ ኡራይ ኣይሁዳ ዋሳ ኩሌ ጌሊዲ ባ ቃላ ቶቁ ኦሊዲ፥ 24 «ናዚሬቴ ዬሱሳ፥ ኔኒ ኑፔ ኣይ ኮያይ? ኑና ቆይሳናው ያዲ? ኔኒ ኣኔኮ ታ ኡራይሰ፤ ኔኒ ያሳ ጌሻ ገዲኪ?» ያገለገሉ።

25 ዬሱሱ ሄ ቱና ኣያና፥ «ሃይዛ፥ ሃ ኣዲያፊ ኩያ» ገዲ ከቲሰ።

26 ቱና ኣያናይ ኡራ ዳፌሬሊዲ፥ ዋሲዲ ኢያፔ ኩዩሰ።

27 ኣሳይ ኡባይ ማላሌቲዲ፥ «ሃይሲ ኣይቤ? ሃ ኡራይ ባ ማታን ሃሪ ኣቶሺን ቱና ኣያናታካ ከቲሰ። ኤንቲ ኢያው ከቲቶሶና፤ ሃይሲ ኣይቤ ኦራላ ቲሚርቲ?» ገዲ፥ ባንታ ገደን ኢሶይ ኢሶዋ ኦይቸደሶና።

28 ዬሱሳ ሱንላይ ኤሌሲዲ ጋለላ ቢታን ዳዒያ ሄራ ኡባን ከዩሰ።

**ዮሱሱ ዳር ሃርጋንቸታ ፓሊሰ (ማቶ 8:14-17፤ ሉቃ 4:38-41)**

29 ዮሱሱ ኣይሁዳ ዋሳ ኩላፊ ኩዩዲ፥ ያይቆባራኔ ዮሃንሳራ ሰሞና ሶኔ ኢንዲሪያሳ ሶ ቢሰ። 30 ሰሞና ማቸ ኣያ ቆያ ሚሻ ሃርጋዳ ዚንዲዳር ዮሱሱ ያ ጋኪያ ዋዳ ኢያው ኦዲደሶና። 31 ኢ ኢኮ ሸቂዲ፥ ኢ ኩሺያ ኦይኪዲ፥ ኢዮ ዳንላ ኤሲሰ። ቆያይኔ ሚሻይ ኣገን ኢያ ኤንታ ሞካሱ።

32 ሃርገዳ ኣሳ ኡባኔ ቱና ኣያናቲ ኦይኪዳ ኣሳ ኡባ ኦማርሲ ኣዋይ ዉሊዳፔ ጉዬ ኢያኮ ኤሂደሶና። 33 ካታማን ዳዒያ ኣሳ ኡባይ ሄ ኩላ ካሬ ሸቂደሶና። 34 ዮሱሱ ዲማ ዲማ ሃርገን

አይከተዳ ዳር አሳ ፓሊዲ፣ ዳር ቱና አያናታ ከሲሰ። ኢ ኦኮኮ ቱና አያናቱ ኤሪዳ ገሾ ኤንታ ኦዲሶና ዲጊሰ።

**ዩሱሲ ጋሊላን ታማርሲሰ**  
(ሉቃ 4:42-44)

35 ዩሱሲ ዋንታ ጉራ ዳንዲዲ፣ አሲ ባይና ቤሲ ቢዲ፣ ያን ያሳ ዋሲሰ። 36 ሲሞኒኔ ኢያራ ዳዔይሳቲ ኢያ ኮዩሼ ቢደሶና። 37 ኤንቲ ኢያ ዳሚዲ፣ «አሳይ ኡባይ ኔና ኮዩሰ» ያጊደሶና።

38 ዩሱሲ ቃሲ ኤንታ፣ «ሄ ሄራን ዳዔያ ሃራ ካታማታ ዩዲቲ። ታኒ ዩዳይ ዋንጌላ ኦዳናው ጊዲያ ገሾ ያንካ ቃላ ኦዳናው ቤሰሰ» ያጊሰ። 39 አይሁዴ ዋሳ ከላታን ቃላ ኦዲሼኔ ቱና አያናታ ከሲሼ፣ ጋሊላ ቢታ ኡባን ዩዩሰ።

**ዩሱሲ ባር ሃርጋንቹዋ ፓሊሰ**  
(ማቶ 8:1-4፤ ሉቃ 5:12-17)

40 ባርይ ኦይኪዳ ኢሲ ኡራይ ዩሱሳኮ ዩዲ፣ ኢያ ሲንላን ጉልባቲዲ፣ «ኔኒ ኮይኮ ታና ጌሻናው ዳንዳዓሳ» ያጊዲ ዋሲሰ።

41 ዩሱሲ ኢያው ቃዴቲዲ፣ ባ ኩሺያ ዩዲዲ ኢያ ቦቹዲ፣ «ታኒ ኮያይሰ፣ ጌያ» ያጊሰ። 42 ሶሁዋራ ባርይ ኡራ ዩዲን ኡራይ ፓዲሰ። 43 ዩሱሲ ኡራ ሚንሊ ናጊሲዲ ከሲ ዩዲሰ። 44 ዩሱሲ ኢያ፣ «ኔና ኡራ፣ ሃይሳ ኦዳሰካ ኦደፓ። ሺን ባዳ ኔ አሳቲላ ካሂኔ ቤሳ። ኔኒ ሃላ ጌሺ ጊዲዳይሳ አሳ ኤሪሳናው፣ ሙሴይ ከቲዳ ያርሹዋ ያርሻ» ያጊሰ።

45 ሺን ኡራይ ቢዲ፣ ጉታ ኡባን አሳ ኡባሰ ኦዲሰ። ሄሳ ገሾ፣ ዩሱሲ ቆንጩ ከዩዲ፣ ካታማ ጌላናው ዳንዳዒቤና። ሺን አሲ ባይናሶን ጋዋን ዳዒሰ፤ ቃሲ አሳይ ኡባ ቤሳፌ ኢያኮ ዮሶና።

## 2

**ዩሱሲ ጉንዳ ኡራ ፓሊሰ**  
(ማቶ 9:1-8፤ ሉቃ 5:17-26)

1 ጉላ ጋላሳፔ ጉዩ ዩሱሲ ቁፊርናሆሜ ሲሚዲ፣ ሶን ዳዔሰ ጊያ ኦዳይ ሲዔቲሰ። 2 አሳ ከላይ ኤኮና ኢዲን፣ ሃሪ አቶሺን ካሪይካ ፀማና ጋካናው ዳር አሳይ ሺቁን፣ ዩሱሲ ቃላ ታማርሲሰ። 3 ኦይዲ አሳቲ ኢሲ ጉንዳ ኡራ ቶኪዲ ኢያኮ ኤሂደሶና። 4 አሳይ ዳሪዳ ገሾ ኡራ ዩሱሳኮ ሺሻናው ኤንታው ዳንዳዔቶና ኢዲን፣ ዩሱሲ ዳዔያ ጊናራ ከላ ቃሪዲ፣

ካራ ቃወጧዲ ኡራ ኢ ዚንዲዳ አልጋራ ዲጌ ዬዲዲ ዬሱሳ ሲንሳን ዋጂሲዶሶና። 5 ዬሱሲ ኤንታ ኣማኑዋ ቤዲዲ፣ ሄ ጉንዳ ኡራ፣ «ታ ናዓው፣ ኔ ናጋራይ ኣቶ ጌቴቴሰ» ያገሰ።

6 ሂጌ ኣስታማሪታፕ ሄ ቤሳን ኡቲዳ ኢሶቲ ኢሶቲ ባንታ ዋዛና፣ 7 «ላ ሃ ኡራይ ሃይሳ ማላ ኢታባ ያሳ ቦላ ኣይሰ ኦዳቲ? ያሳ ፃላላፕ ኣቲን ሃሪ ኦኒ ናጋራ ኣቶ ጋናው ዳንዳዲ?» ጊዲ ቆፒዶሶና።

8 ኤንቲ ባንታ ዋዛናን ሄሳዳ ቆፒዳይሳ ዬሱሲ ሶሁዋራ ባ ኣያናን ኤሪዲ፣ ኤንታኮ፣ «ሂንቴ ሂንቴ ዋዛናን ኣይሰ ሄሳዳ ቆፕቲ? 9 ጉንዳ ኡራ፣ ኔ ናጋራይ ኣቶ ጌቴቴሰ» ጌይሲ ማቴዬ? ዋይኮ፣ «ዳንዳ ኤቃዳ ኔ አልጋ ቶካዳ ባ» ጌይሲ ማቴ? 10 ሸን ታው፣ ኣሳ ናዓሰ፣ ሳዓ ቦላ ናጋራ ኣቶ ጋናው ማቲ ዳዔይሳ ሂንቴ ኤራና ማላ» ጊዲ ሄ ጉንዳ ኡራኮ፣ 11 «ኔና ጋይሰ፣ ዳንዳ ኤቃዳ ኔ አልጋ ቶካዳ ኔ ሶ ባ» ያገሰ።

12 ኡራይ ኤሌሲ ዳንዲ ኤቁዲ፣ ባ አልጋ ቶኪዲ ኣሳ ኡባይ ቤዲሺን ቢሰ። ኣሳይ ኡባይ ማላሌቲዲ፣ «ኦኒ ሃይሳ ማላ ማላሊሲያባ ቤዲ ኤርኮ» ያገዲ ያሳ ጋላቲዶሶና።

**ዬሱሳ ለዌ ፃገሰ**  
(ማቶ 9:9-13፤ ሉቃ 5:27-32)

13 ዬሱሲ ቃሲ ጋሊላ ኣባ ዶና ሲሚ ቢዲ፣ ባኮ ዪዳ ኣሳ ኡባ ታማርሲሰ። 14 ያራ ኣጂሼ፣ ኢልፊዮሳ ናዓ ለዌ ጌቴቴይሲ ቃራፃ ቃንጂሲያ ቤሳን ኡቲዳይሳ ቤዲዲ፣ «ታና ካላ» ያገሰ። ለዌይ ዳንዲ ኤቁዲ ኢያ ካሊሰ።

15 ዬሱሲ ካሌ ማናው ለዌ ሶን ኡቲሰ። ኢያ ካሊያ ኣሳይ ዳሮ ጊዲያ ጊሾ ቃራፃ ቃንጂሲያ ዳሮ ኣሳይን ናጋራንቸቲ ኢያራኔ ኢያ ታማራታራ ኢሲፊ ኡቲዶሶና። 16 ሂጌ ኣስታማሪ ጊዲዳ ኢሲ ኢሲ ፋሪሳዌቲ ዬሱሲ ናጋራንቸታራኔ ቃራፃ ቃንጂሲይሳታራ ካሌ ሚሸን ቤዲዲ፣ «ኢ ኣይሰ ናጋራንቸታራኔ ቃራፃ ቃንጂሲይሳታራ ካሌ ሚ?» ያገዲ፣ ኢያ ታማራታ ኦይቺዶሶና።

17 ዬሱሲ ኤንቲ ጌይሳ ሲዲዲ፣ «ሃርጋንቸታፕ ኣቲን ፓፃታሰ ኣኪሜ ኮሼና። ታኒ ናጋራንቸታ ጃጋናው ያሲፔ ኣቲን ጂሎታ ጃጋናው ያቢኬ» ያገዲ ኤንታው ዛሪሰ።

**ጆማባ ኤራናው ሸቂዳ ኦይሻ**  
(ማቶ 9:14-17፤ ሉቃ 5:33-39)

18 ፀማቂያ የሃሂሳ ታማራቲኔ ፋሪሳዊቲ ፆሞሶና። ኢሲ ኢሲ አሳቲ ዬሱሳኮ ዩዲ። «የሃሂሳ ታማራቲኔ ፋሪሳዊታ ታማራቲ ፆሞሶና፤ ሺን ኔ ታማራቲ አይሰ ፆሞኮና?» ያጊደሶና።

19 ዬሱሲ ኤንታኮ። «ያጋኑዋ ዩዲ አሳቲ ማቸው ኤኬይሲ ኤንታራ ዴሲሺን፤ ፆማናው ዳንዳዖና? ማቸው ኤኬይሲ ኤንታራ ዴሲሺን፤ ፆማናው ዳንዳዖኮና። 20 ሺን ማቸው ኤኬይሲ ኤንታ ማታፔ ኤኬታና ዋዴይ ያና፤ ኤንቲ ሄ ዋዴ ፆማና።

21 «ጩጋ ማዖ ቦላ ኦራላ ዋሊዲ ሲኪያ አሲ ባዋ። ዋሊዲ ሲኪኮ። ኦራላይ ጩጋ ማዑዋ ዳኬሰ፤ ዳኬላይካ ካሴይሳፊ ደሪሰ። 22 ቃሲ ማልዓንቶ ዋይኔ ጩጋ ኦጎሮን ቆሊያ አሲ ባዋ። ሺን ቆሊኮ። ሄ ዋይኔይ ኦጎሮዋ ዳኬሰ፤ ባዉካ ጉኬሰ፤ ኦጎሮይካ ኢቲሰ። ሺን ማልዓንቶ ዋይኔይ ኦራላ ኦጎሮን ቆሌቲሰ» ያጊሰ።

ሳምባታባ ኤራናው ሺቂዳ ኦይሻ  
(ማቶ 12:1-8፤ ሉቃ 6:1-5)

23 ዬሱሲ ኢሲ ሳምባታ ጋላሰ ባንጋ ጋዴ ጊዶራ አዲሺን፤ ኢያ ታማራቲ ኢያራ ቢሼ ባንጋ ቲያ ሺርኪዲ ሞሶና። 24 ፋሪሳዊቲ ዬሱሳኮ። «ሄኮ፤ ኔ ታማራቲ ሳምባታ ጋላሰ ዋጋ ጊደናባ አይሰ አሉና?» ያጊደሶና።

25 ዬሱሲ ኤንታኮ። «ዳዊቲይ ኮሻቲዲ፤ ሚያባ ኮዩዳ ዋዴ ባራ ዴዴይሳታራ ኦሊዳይሳ ናባቢቤኬቲ? 26 አቢያታሪ ካሂኔ ሃላቃ ጊዲዲ ዴዴያ ዋዴ ዳዊቲይ ያሳ ኬሊ ጌሊዲ፤ ካሂኔታ ፃላሊ ማናፔ አቲን ኦኒካ ማናው ዋጋ ጊደናይሳ ጎዳ ሲንሳን ዋሊዲ ዳቡዋ ሚሰ፤ ባራ ዴዴይሰታሰካ አሚሰ» ያጊሰ።

27 ቃሲካ ዬሱሲ ኤንታኮ። «ሳምባቲ አሳ ናዓ ጎዓሰ ሜዴቲሲፔ አቲን አሲ ሳምባታሰ ሜዴቲቤና። 28 ሄሳ ጊሾ፤ አሳ ናዓይ፤ ሃሪ አቶሺን ሳምባታሰካ ጎዳ» ያጊሰ።

3

ዬሱሲ ኩሼ ጉንዳ ኡራ ፓሊሰ  
(ማቶ 12:9-14፤ ሉቃ 6:6-11)

1 ዬሱሲ አይሁዴ ዋሳ ኬሊ ሲሚ ጌሊሰ። ያን ኩሼይ ጉንዲዳ ኢሲ ኡራይ ዴዴሰ። 2 ኢሲ ኢሲ አሳይ ዬሱሳ ሞታናው ኮዩዲ፤ ኩሼይ ጉንዲዳ ኡራ ሳምባታ ጋላሰ ኢ ፓሊኮኔ አጊኮ ቤዓናው ኮዩዲ ሚንሊዲ ናጎሶና። 3 ዬሱሲ ኩሼይ ጉንዲዳ ኡራ፤ «ዳንዳ

ኤቃዳ ሃ ሲንሐ ያ» ያገሰ። 4 ሄሳፌ ጉዬ፣ አሳኮ፣ «ሳምባታ ጋላሰ ሎዖባ ኦሌይሲ ዋጌዬ ኢታባ ኦሌይሲ ዋጌ? አሳ ሼምፖ አሾዬ ዋይኮ ዋጅ?» ያገዲ ኦይቸሰ።

ሺን አሳይ ሲዒ ገሰ። 5 ዬሱሲ ሃንቄቲዲ፣ ኤንታ ዩሺ አሊ ያሊዲ፣ ኤንቲ ኦዲን ሲዖናይሳታ ገዲያ ገሾ ኤንታ ቦላ ዳር አዛኒሰ። ሄ አዲያኮ፣ «ኔ ኩሺያ ፒዲ ኦላ» ያገሰ። ኡሪይ ፒዲ ኦሊን ኢያ ኩሼይ ፓዲሰ። 6 ኤሌሲዲ ፋሪሳዊቲ አይሁዳ ዋሳ ኬላፌ ካሪ ኬዬዲ፣ ዬሱሳ ዋቲ ዋጃኔኮ ማቄታናው ሄርዲሳ ባጋታራ ኢሲ ሶ ሸቂዶሶና።

**አሳይ ዬሱሳኮ ሸቂዶሶና**

7 ዬሱሲ ባ ታማሬታራ ጋሊላ አባኮ ቢሰ። ጋሊላፔኔ ዪሁዳፔ ዪዳ ዳር አሳይ ኢያ ካሊዶሶና። 8 ቃሲካ ዬሩሳላሜፔ፣ ኢዲሚያሳፔ፣ ዮርዳኖሴ ሻፋ ፒንላፌ፣ ዲርሳ ካታማፔኔ ሲዶና ካታማፔ ዬሱሲ ኦሊዳባ ሲዒዲ፣ ዳር አሳይ ኢያኮ ዪዶሶና። 9 አሳ ዳርቴላፌ ዴንዶይሳን ኢያ ኡንዔልና ሜላ ኢያ ታማሬቲ ዋሳሎ ኢያው ገሊሳና ሜላ ከቲሰ። 10 ዳር አሳ ኢ ፓሊዳ ገሾ ሃርገያ አሳ ኡባይ ኢያ ቦቻናው ሱጉቶሶና። 11 ቱና አያናይ ኦይኪዳ አሳቲ ኢያ ቤዒዳ ዋዴ ኢያ ሲንላን ኩንዲዲ፣ ባንታ ቃላ ጆቁ ኦሊዲ፣ «ኔኒ ያሳ ናዓ ገዲኪ?» ያጎሶና።

12 ዬሱሲ ሄ ቱና አያናቲ ባናቴላ ኦዴስካ ቆንጨሶና ሜላ ኤንታ ሚንሊዲ ሃንቄቲሰ።

**ዬሱሲ ታማኔ ናምዑ ሃዋሬታ ዶሪስ  
(ማቶ 10:1-4፤ ሉቃ 6:12-16)**

13 ዬሱሲ ዴሪያ ቦላ ኬዬዲ፣ ባ ኮዪዳ አሳታ ባኮ ያገሰ፤ ኤንቲካ ኢያኮ ቢዶሶና። 14 ኤንቲ ባራ ዳና ሜላኔ ቃላ ታማርሳና ሜላ ታማኔ ናምዓታ ዶሪዲ፣ ኤንታ፣ «ሃዋሬታ» \* ገዲ ሱንላሰ። 15 ቱና አያናታካ ኬሳና ሜላ ኤንታው ማታ አሚሰ።

16 ኢ ዶሪዳ ታማኔ ናምዓቲ ሃይሳታ፣ ጳዲርሳ ያገዲ ሱንላዲ ሰሞና፣ 17 ቦዓኔርጌስ (ዳዳ ዳኒያ አሳታ) ያገዲ ሱንላዲይሳታ፣ ዛብዲዮሳ ናይታ ያይቆባኔ ያይቆባ አሻ ዮሃኒሳ፣ 18 ኢንዲሪያሳ፣ ፊልጶሳ፣ ባርቶሎሚዮሳ፣ ማቶሳ፣ ቶማሳ፣ ኢልፊዮሳ ናዓ ያይቆባ፣ ታዲዮሳ፣ ባ ቢታሰ ሚሼቲያ ሲሞና፣ 19 ዬሱሳ አሊ አሚዳ አሰቆርታ ዪሁዳ።

3:9 ማር 4:1፤ ሉቃ 5:1-3 \* 3:14 ሃዋሬ፣ ሃዋሬ ጉሳይ ከቴቲዳይሳ ጉሱ።

ዩሱሳኔ በዔልዜቡላ  
(ማቶ 12:22-32፤ ሉቃ 11:14-23፤ 12:10)

20 ሃሳፌ ጉዬ፥ ዩሱሱ ሶ በሰ። ቃሲ ዳሮ አሳይ ሺቁን፥ ኢኔ ኢያ ታማራቲ ሃሪ አቶሺን ካሊ ማናውካ ዳንዳዒቦኮና። 21 አሳይ ኢያ፥ «ሳይሰ» ጊያ ጊሾ ኢያ ዳቦቲ ሃሳ ሲዒዲ ኢያ ኤካናው በደሶና።

22 ሂጌ አስታማሬታፕ ኢሶቲ ኢሶቲ ዩሩሳላሜፕ ዩዲ፥ «ኢያ ቦላ በዔልዜቡላ ዳዔሰ»፥ ኢ፥ «ፃላሄይ ዋልቃን ቱና አያናታ ኬሴሰ» ያጊዲ ኦዴቲደሶና።

23 ዩሱሱ አሳ ባኮ ፃጊዲ ለሚሶ ኦዲሰ። «ፃላሄይ ፃላሄ ዋቲ ኬሳናው ዳንዳዒ? 24 ኢሲ ካዋቲላይ ባ ጊደን ሻኬቲኮ ሄ ካዋቲላይ ኤቃናው ዳንዳዒና። 25 ሃሳዳካ፥ ኢሲ ኬላ አሳይ ባንታ ጊደን ሻኬቲኮ ሳያናፕ አቲን ዳናው ዳንዳዎኮና። 26 ሂዛ፥ ፃላሄይ ባራ ካጩቲዲ ሻኬቲኮ ሳዮፕ አቲን ዳናው ዳንዳዒና።

27 «ሺን ኮይርቲዲ ዋልቃማ ኡራ ቃቾና ዳዒሼ ኢያ ኬላ ጌሊዲ፥ ኢያ ሚሺያ ቦንቃናው ዳንዳዒያ አሲ ባዋ። ቃቺ ሲሚዲ ኢያ ኬላ ቦንቃናው ዳንዳዒሰ።

28 «ታኒ ሂንቲው ቱማ ኦዳይሰ፤ ያሳይ አሳ ናይታሰ ናጋራ ኡባኔ ኤንቲ ጫያ ጫሼ ኡባ አቶ ጋና። 29 ሺን ጌሻ አያና ቦላ ኢታባ ኦዴቲያ ኦዳሰካ ሜሪና ናጋራ ጊዳናፕ አቲን ያሳይ ኡባራካ ኢያ ማሪና» ያጊሰ። 30 ዩሱሱ ሃሳ ጊዳይ፥ ኢሲ ኢሲ አሳቲ፥ «ኢያ ቦላ ቱና አያናይ ዳዔሰ» ያጊዳ ጊሾሳ።

ዩሱሳ አዪውኔ ኢያ ኢሻታ  
(ማቶ 12:46-50፤ ሉቃ 8:19-21)

31 ኢያ አያኔ ኢያ ኢሻቲ ዩዲ ካሬን ኤቁዲ፥ ኢያኮ አሴ ከቲዲ ኢያ ፃጊደሶና። 32 ኢያ ማታን ኡቲዳ ዳሮ አሳቲ፥ «ሄኮ፥ ኔ አዩራኔ ኔ ኢሻታራ ካሬን ኤቁዲ ኔና ኮዮሶና» ያጊደሶና።

33 ዩሱሱ ዛሪዲ፥ «ታ አያ ኦኔ? ቃሲ ታ ኢሻቲ ኦናንቴ?» ያጊሰ። 34 ባ ማታን ኡቲዳ አሳ ዩሺ አሊ ፃሊዲ፥ «ሄኮ፥ ታ አያኦኔ ታ ኢሻቲ ሃይሳታ። 35 ያሳይ ሼኒያ ኦሊያ ኡባይ ታ ኢሻ፥ ታ ሚቾኔ ታ ኦዮ» ያጊሰ።



# 4

ዜሬሌ ዜሬያ ኡራ ለሚሶ  
(ማቶ 13:1-9፤ ሉቃ 8:4-8)

1 ዬሱሲ ዛሪዲ ጋለላ አባ ማታን ታማርሴስ። ዳሮ አሳይ ኢያ ዩሹዋን ሸቁን፣ አባን ዳዒያ ዋጎሉዋ ጊዶ ጌሊዲ ኡተስ፣ አሳ ኡባይ አባ ማታን ዳዒስ። 2 ኢ ኤንታ ዳሮባ ለሚሶን ታማርሴስ። ታማርሴሼ ሃይሳዳ ያገሰ።

3 «ሲዒቱ! ኢሲ ኡራይ ዜሬሌ ዜራናው ከዩስ። 4 ኢ ዜሪሺን፣ ኢሲ ኢሲ ዜሬሳይ ኦጌ ጋፃን ዋዲስ፤ ካሮቲ ዩዲ ሚዶሶና። 5 ኢሲ ኢሲ ዜሬሳይ ጋርሳን ሻሎይ ዳዒያ ቢታ ቦላ ዋዲስ። ዳሮ ቢቲ ባይና ጊሾ ሄ ዜሬሳይ ኤሌሲዲ ዶሊስ። 6 ሺን አዋ ከዩዳ ዋዳ ሹሊስ። ሎይሊዲ ፃጶ ዩዲቦና ጊሾ ኤሌሲ ሚሊስ። 7 ኢሲ ኢሲ ዜሬሳይ አጉንሳ ጊዶን ዋዲስ። ዶሊዳይሳ አጉንሳይ ዲጩዲ ጩሊዳ ጊሾ አይፊ አይፎና አቲስ። 8 ኢሲ ኢሲ ዜሬሳይ አራዳ ቢታን ዋዲዲ ዶሊስ። ዲጩዲ ኢሶይ ሃስታማ፣ ኢሶይ ኡሱፑን ታማ ኢሶይ ፃታ አይፊስ» ያገሰ። 9 «ሲዒያ ሃይሊ ዳዒያ ኦኒካ ሲያ» ያገሰ።

ዬሱሲ ለሚሶን ኦዲዳ ጋሱዋ  
(ማቶ 13:10-17፤ ሉቃ 8:9-10)

10 ዬሱሲ ኦዲዳይሳ ሲዒዳ ኢሲ ኢሲ አሳቲኔ ታማኔ ናምቡ ታማሬቲ ዬሱሲ ባርካ ዳዒሺን፣ ኢያኮ ሸቁዲ ሄ ለሚሱዋ ቢርሼላ ኦይቺዶሶና። 11 ዬሱሲ ኤንታኮ ሃይሳዳ ያገሰ። «ሂንቴው ያሳ ካዋቴላ ፀራ ኤሮይ አሜቲስ። ሺን ሃራታስ ካዋቴላፊ ካሬን ዳዒይሳታስ ኡባባይ ለሚሶን ኦዳቴስ። 12 ጋሶይካ፣

አንቲ ጃሎሶና፣ ሺን ዳሞኮና።  
ሲዶሶና፣ ሺን አኬኮኮና።  
ኤንቲ ዳሚያኮኔ አኬኪያኮ፣  
ያሳኮ ሲማና  
ኢካ ኤንታ ማራናሺን» »  
ያገሰ።

ዜሬላ ለሚሱዋ ቢርሼላ  
(ማቶ 13:18-23፤ ሉቃ 8:11-15)

13 ዬሱሲ ኤንታኮ፣ «ሃ ለሚሶይ ሂንቴው ጌሌኔ? ያቲን፣ ለሚሶ ኡባ ሂንቴ ዋቲ አኬካኔ? 14 ዜሬይሲ ያሳ ቃላ ዜሬስ።

15 ቃላይ ዜሬቲያ ዎዳ ኦጌ ጋፃን ዎዲዳይሳቲ ቃላ ሲዒዳይሳታ። ሺን ፃላሄይ ሶሁዋራ ዩዲ፣ ኤንታ ዎዛናን ዜሬቲዳ ቃላ ማፂ ዲጌስ። 16 ሄሳዳካ፣ ጋርሳን ሻሎይ ዳዒያ ቢታን ዜሬቲዳይሲ ቃላ ሲዒዲ፣ ኤሌሲዲ ኡፋይሳን ኤኬይሳ። 17 ሺን ኤንታው ሚኖ ፃጶይ ባይና ጊሾ ሃዒሳፊ ኣቲን ጋሞዖኮና። ጉላ ዎዳፔ ጉዬ ቃላ ጋሶን ዎዩይ ዎይኮ ጎዲ ጋኪያ ዎዳ ኤሌሲዲ ዱቤቶሶና። 18 ኣጉንላ ጊዶን ዜሬቲዳይሲ ቃላ ሲዒዳይሳታ። 19 ሺን ሃ ሳዓ ዳዑዋሰ ሂርጎይ፣ ዲሬቴላ ደሶይኔ ሃራባ ኣሞቴይሲ ኢያ ዎዛናን ጌሊዲ ቃላ ጩሊያ ጊሾ ኣይፊ ኣይፎና ኣቲስ። 20 ሺን ኣራዳ ቢታን ዜሬቲዳይሳቲ ቃላ ሲዒዲ ኤኬይሳታ። ኤንቲ ኢሶይ ሃሰታማ፣ ኢሶይ ኡሱፑን ታማ ኢሶይ ፃታ ኣይፊስ» ያጊስ።

**ጌማን ዳዒያ ዖምፔ**  
(ሉቃ 8:16-18)

21 ዬሱሲ ጉጂዲ፣ «ዖምፔ ኤኪዲ፣ ዳቾፊ ዎይኮ ኣልጋፊ ጋርሳን ዎሊያ ኣሲ ዳዒ? ዶቃ ቤሳን ዎላኔይ? 22 ሂዛ፣ ቆስቲዳባይ ኡባይ ቆንጩ ኬያና፤ ጌሚዳባይ ኡባይ ኤሬቶና ኣቴና። 23 ሲዒያ ሃይሊ ዳዒያ ኦኒካ ሲዖ» ያጊስ።

24 ቃሲ ኤንታኮ፣ «ሂንቲ ሲዒያባ ኣኬኪዲ ሲዒቲ! ዖሳ ቃላ ሂንቲ ሲዒይሳ ማላ ኢ ሂንቲው ኣኬካ ኢማና። ኡባካ ሂንቲው ዳርሲዲ ኢማና። 25 ኢሲባይ ዳዒያ ኡራስ ጉጂ ኢማታና፣ ባይናይሳፊ ሃሪ ኣቶሺን፣ ኢያው ዳዒያ ሄ ጉሊያካ ኤኬታና» ያጊስ።

**ዲጩያ ዜሬላ ለሚሶ**

26 ዬሱሲ ዛሪዲ፣ «ዖሳ ካዎቴላይ ባ ጋዴን ዜሬላ ዜሪያ ኣሳ ማላ። 27 ሄ ኡራይ ቃማ ጲስኬስ፤ ዎንታ ዳንዴስ። ኢ ባ ሁዒን ዎኒያኮ ኤሮና ዳዒሺን ሄ ዜሬላይ ደሊሲኔ ዲጩስ። 28 ቢታይ ካሊ ባርካ ኢማስ። ኮይሮ ደሊዲ ዲጩስ፣ ካሊዲ ኣይፋናው ጋምቡዳስ፣ ዉርሴላን ኩማላ ኣይፊ ኣይፊስ። 29 ሺን ካላይ ጋኪያ ዎዳ ኡራይ ሶሁዋራ ባጫራ ጌሊ ኣኬስ» ያጊስ።

**ኣይፊ ጉላ ሚላ ለሚሶ**  
(ማቶ 13:31-34፤ ሉቃ 13:18-19)

30 ዬሱሲ፣ «ኦኒ ዖሳ ካዎቴላ ኣይ ዳኔስ ጋኔ? ዎይኮ ኣይቢራ ለሚሳኔ? 31 ዖሳ ካዎቴላይ ኣይፊ ጉላ ሚሊ ዳኔስ። ሄ ሚላ

---

4:21 ማቶ 5:15፤ ሉቃ 11:33      4:22 ማቶ 10:26፤ ሉቃ 12:2      4:25 ማቶ 13:12፤ 25:29፤ ሉቃ 19:26      4:29 ኢዩ 3:13

አይፊያ ዜሪያ ዋዴ ሳዓን ዴሲያ ሚላ አይፊ ኡባፌ ጉፃሰ።  
 32 ዜሪን ዶሊዲ አታኪልቴ ኡባፌ ገታቴስ፤ ዳር ዳሺ ዳዩሰ።  
 ካፎቴ ኢያ ታሺያ ቦላ ኬፂዲ ኡታና ጋካናው ዳዩሰ» ያገሰ።  
 33 ዬሱሲ ሃይሳ ሚላ ዳር ለሚሶን አሳይ አኬካናው  
 ዳንዳዔይሳ ሚላ ቃላ ኦዲሰ። 34 አሳሰ ለሚሶይ ባይና ኦዴና።  
 ሺን ዬሱሲ ባ ታማሬታ ፃላላራ ዴሲያ ዋዴ ኤንታው ኡባባ  
 ቢርሺዲ ኦዲሰ።

**ዬሱሲ ሆቢያ ሲዒ ኦሊሰ**  
 (ማቶ 8:23-27፤ ሉቃ 8:22-25)

35 ሄ ጋላሰ ሳዓይ ኦማርሲን፣ ዬሱሲ ባ ታማሬታኮ፣ «አባፌ  
 ሄፊንሉ ፒናሰ» ያገሰ። 36 ኢያ ታማሬቲ ዳር አሳ ዬጊ አገዲ፣  
 ዬሱሲ ካሴ ጌሊ ኡቲዳ ዋጎሉዋን ጌሊዲ ዬሱሳ ባንታራ  
 ኤፊዶሶና። ሃራ ዋጎሎቲካ ያን ዴዖሶና። 37 ዋልቃማ ጎቴይ  
 ዴንዲዲ፣ ሆቤይ ዋጎሉዋ ሾጨን፣ ኩማና ጋካናው ዋጎሉዋ ገዶ  
 ሃሉ ጌሊሰ። 38 ሄ ዋዴ ዬሱሲ ዋጎሉዋን ጉዬ ባጋራ ቦርኮቲዲ  
 ጴሰኪሰ። ኢያ ታማሬቲ ኢያ ዴንሉዲ፣ «አሰታማሪያው፣ ኩኒ ጳያ  
 ዋዴ ኔ ሲዒ ጋዳ ፃላይ?» ያገደሶና።

39 ያቲን፣ ኢ ባርኪዲ ጎቲያ፣ «ሲዒ ጋ» ገዲ፣ አባካ፣ «ዋፑ  
 ጋ» ገሰ። ጎቴይካ ሲዒ ገን ኡባባይ ዋፑ ገሰ። 40 ዬሱሲ ባ  
 ታማሬታኮ፣ «አይሰ ሃይሳዳ ባቤቲ? ሂንቴው አማናይ ዋኒዲ  
 ጳዪዴ?» ያገሰ።

41 ኤንቲ ዳር ባቢዲ ባንታ ገደን፣ «ሃይሲ ሃሪ አቶሺን፣  
 ጎቴይኔ አባይ ከቴቴይሲ ኦኔ?» ያገደሶና።

**5**

**ቱና አያኒ ኦይኪዳ ኡራይ ፓፂሰ**  
 (ማቶ 8:28-34፤ ሉቃ 8:26-39)

1 ዬሱሲኔ ኢያ ታማሬቲ አባ ፒኒዲ፣ ጌርጌሶኔ ገያ ቢታ  
 ጋኪዶሶና። 2 ዬሱሲ ዋጎሉዋፔ ዋጴያ ዋዴ ቱና አያናይ ኦይኪዳ  
 ኢሲ ኡራይ ዲፎፔ ከዬዲ ኢያራ ጋሃቲሰ። 3 ሄ ኡራይ ዲፋዋን  
 አቁ ፔዒዲ ዴዔሰ። ኢያ ኦኒካ ሳንላላታን ቃቫናው ዳንዳዔና።  
 4 ኢ ዳር ቶሆ ዲላኒኔ ሳንላላታን ቃሽቲዲ ዴዔሰ። ሺን ሳንላላታ  
 ዲሰጌጌሰ፣ ዲላ ማንሐጌሰ። ኢያ ቱቃናው ዳንዳዔያ ኦኒካ  
 ባዋ። 5 ኢ ቃማኔ ጋላሰ ሄ ዲፋዋኒኔ ዴሬ ቦላ ዋሴሰ፣ ባ ቦላካ  
 ሹቻን ጋሪሰ።

6 ዬሱሳ ሃሆን ቤዒዳ ዋዴ ዋፂ ቢዲ ኢያ ሲንላን ጉልባቲሰ።  
 7 ሄ ኡራይ ባ ቃላ ጴቁ ኦሊዲ፣ «ኡባፌ ቦላ ያሳ ናዓው ዬሱሳ፣

ኔና ኃና አይቤ ጋሌይ? ታና ጳይሶና ማላ ታኒ ኔና ያሳ ሱንላን ዋሳይሰ» ያገሰ። 8 ኢ ሄሳ ገዳይ ዩሱሲ ኢያ፡ «ላ ሃ ቱና አያናው፥ ሃ አዲያፌ ከያ» ያገዳ ገሸሳ።

9 ዩሱሲ ኢያኮ፡ «ኔ ሱንላይ ኦኔ?» ያገዳ ኦይቸሰ።

ኢ፡ «ኦኒ ዳር ገዲያ ገሸ ታ ሱንላይ ለገኖና» ያገሰ። 10 ቱና አያናቲ ባንታና ሄ ቢታፌ ከሲ ዩዶና ማላ ዩሱሳ ማንሊዲ ዋሲዶሶና።

11 ሄ ዴሪያ ቦላ ዳር ጉዲንሎ ዉዴይ ሃሙቲሰ። 12 ቱና አያናቲ ዩሱሳኮ፡ «ኦና ሂኒ ጉዲንሎ ዉዲያኮ ዩዳርከ፡ ኤንታን ቢዲ ጌሎሰ» ያገዳ ዋሲዶሶና። 13 ዩሱሲ ኤንታኮ፡ «ቢቲ» ያገሰ። ያቲን ቱና አያናቲ አዲያፌ ከዩዲ ጉዲንሎታን ጌሊዶሶና። ናምቡ ሙኩሉ ገዲያ ጉዲንሎ ዉዴይ ኣፎ ዶናራ ዲርገዲ ቢዲ ኣባን ጌሊዲ ማቲቲዶሶና።

14 ጉዲንሎ ዉዲያ ሄማይሳቲ ባቃቲ ቢዲ ሃኒዳባ ካታማኒኔ ጋፃሪያን ኦዲዶሶና። ያቲን ኣሳይ ሃኒዳባ ቤዓናው ከዩዶሶና።

15 ኣሳይ ዩሱሳኮ ያ ዋዴ ቱና አያናን ኦይከቲዳ ኡራ ቤዒዶሶና። ኢ ባ ዋዛናኮ ሲሚዲ፡ ማፆ ማዒዲ፡ ያን ኡቲዳይሳ ቤዒዳ ዋዴ ኡባይ ያዩዶሶና። 16 ሄሳ ቤዒዳ ኣሳቲ ቱና አያናቲ ኦይከዲ ኡራ ቦላኔ ጉዲንሎታ ቦላ ሃኒዳባ ኡባ ኣሳሰ ኦዲዶሶና። 17 ሄሳ ገሸ፡ ኣሳይ ባንታ ቢታፌ ዩሱሲ ባና ማላ ዋሲዶሶና።

18 ዩሱሲ ዋጎሉዋን ጌሊያ ዋዴ ካሴ ቱና አያናይ ኦይከዲ ዩዲዳ ኡራይ፡ ዩሱሳ ካላናው ኢያ ዋሲሰ። 19 ሺን ዩሱሲ ኢዲዲ ኢያኮ፡ «ኔ ሶ ሲማዳ፡ ጎዳይ ኔው ኣይ ማላ ገታባ ኦሉዳኮኔ ኔው ኣይ ማላ ከሂዳኮ ኔ ሶ ኣሳሰ ኦዲ» ያገሰ። 20 ኡራይ ቢዲ ታሙ ካታማ ገያሶን ዩዩዲ፡ ዩሱሲ ባው ኣይ ማላ ገታባ ኦሉዳኮ ኦዲሰ። ኢ ኦዲዳይሳ ሲዒዳ ኣሳ ኡባይ ማላሉቲዶሶና።

**ሃይቂዳ ናዒዉኔ ዩሱሳ ማዕቀ ቦቹዳ ማጫሲው**  
(ማቶ 9:18-26፤ ሉቃ 8:40-56)

21 ዩሱሲ ሲሚዲ፡ ዋጎሉዋን ጌሊዲ፡ ኣባ ጒኒዳፔ ጉዩ ዳር ኣሳይ ኣባ ጋፃን ኢያ ዩሸቀን ሸቂዶሶና። 22 ኢያርሳ ገያ ኣይሁዴ ዋሳ ከላ ሃላቃታፔ ኢሶይ፡ ዩሱሳ ቤዒዳ ዋዴ ኢያኮ ዩዲ ኢያ ቶሁቀ ቦላ 23 ኩንዲዲ፡ «ታ ናዒያ ሃርጋዳ ሃይቃና ሃናውሱ። ኢያ ጋፃዳ ዴዳና ማላ ያዳ ኔ ኩሺያ ኢ ቦላ ዋላርኪ» ያገዳ ዩሱሳ ማንሊዲ ዋሲሰ።

24 ዩሱሲ ኢያርሳራ ቢሰ። ኢ ቢሺን ዳር ኣሳይ ኢያ ካሊዲ ኡንዒሊዶሶና።

25 ታማኔ ናምቡ ላይሊ ኢ ቦላፌ ሱሊ ጎገያ ኢሲ ማጫሲያ ዴዓዉሱ። 26 ዳር ኣከሜቲ ኢዮ ኣከሚዶሶና፡ ሺን ኢያ ጋፃ

ካዔታሱ። ኢያ ባ ሚሺያ ኡባ ወርሲንካ ኢው ሃ ኢቲሰፔ ኣቲን ኣይኮካ ማዲቤና። 27 ሄ ማጨሲያ ዩሱሳባ ሲዒዳ፣ ኣሳ ካንፋዳ ዩሱሳ ጉዩራ ያዳ ኢያ ማዑቀ ቦቻሱ። 28 ኢያ፣ «ታኒ ሃሪ ኣቶሺን ኢያ ማዑቀ ቦቹያኮ ፓፃና» ጋዳ ቆፓሱ።

29 ኢፔ ጎጊያ ሱፋይ ሶሁቀራ ኤቂ ኣጊሰ። ኢያ ባ ዋያፔ ፓዲዲሳ ባ ኣሳቴላን ኤራሱ። 30 ዩሱሲ ባፔ ዋልቂ ኬዩዲዲሳ ባ ሁዒን ኤራዲ፣ ኤሌሲዲ ዳሮ ኣሳ ጊዶን ጉዩ ሲሚዲ፣ «ታ ማዑቀ ቦቹዳይ ኦኔ?» ያጊሰ።

31 ኢያ ታማሪቲ፣ «ኣሳይ ኔና ሱጌይሳ ቤዓሼ፣ <ዋይጋዳ ታና ኦኔ ቦቹዳይ ያጋይ?» » ያጊዶሶና።

32 ዩሱሲ ሄሳ ኦኒ ኦሊዳኮ ቤዓናው ዩሺ ኣሊ ያለሰ። 33 ሺን ማጨሲያ ባው ሃኒዳባ ኤራዳ፣ ያሻን ኮኮራሼ ያዳ ዩሱሳ ሲንፋን ጉፋናሱ፤ ቃሲ ሃኒዳባ ኡባ ተማ ኢያው ኦዳሱ። 34 ያጊን፣ ዩሱሲ ኢኮ፣ «ታ ናቴ፣ ኔና ኔ ኣማናይ ፓሊሰ፣ ሳሮን ባ፣ ኔ ዋያፔካ ፓፃ» ያጊሰ።

35 ዩሱሲ ቡሮ ሄሳ ኦዲሺን፣ ኣይሁዴ ዋሳ ኬፋ ሃላቃ ሶፔ ኪቲቲዳ ኣሳቲ ዩዲ፣ «ኔ ናዒያ ሃይቃሱ፣ ኣስታማሪያ ኣይሰ ዳቡሪሳይ?» ያጊዶሶና።

36 ሺን ዩሱሲ ኤንቲ ጌይሳ ሲዒዲ፣ ኣይሁዴ ዋሳ ኬፋ ሃላቃኮ፣ «ኣማና ያለላ ኣማናፔ ኣቲን ባቦፋ» ያጊሰ። 37 ዩሱሲ ጳዒሮሳፔ፣ ያይቆባፔ ኔ ያይቆባ ኢሻ ዮሃኒሳፔ ሃሪ ኦኒካ ባና ካሎና ሜላ ዲጊሰ። 38 ኤንቲ ኣይሁዴ ዋሳ ኬፋ ሃላቃ ሶ ጋኪያ ዋዴ ዩሱሲ ኣሳይ ካሃ ጳዩዲ ዩኬይሳኔ ዜሌሌይሳ ቤዒሰ። 39 ጌሊዲ ኣሳኮ፣ «ኣይሰ ካሃ ጳዩዲ ዩኬቲ? ናዒያ ጳሰካሱፔ ኣቲን ሃይቃቡኮ» ያጊሰ።

40 ኣሳይ ኢያ ቦላ ሚጨሰ። ሺን ኣሳ ኡባ ካሬ ኬሲዲ፣ ናዒ ኣዋ፣ ኣዩዉኔ ሄቩ ታማሪታ ባራ ኤኪዲ ናዒያ ዴዒያሱቀ ጌሊሰ።

41 ዩሱሲ ናዒ ኩሺያ ኦይኪዲ፣ «ያሊታ፣ ቁሚ» (ጉፋ ናቴ፣ ኔና ጋይሰ ዴንዳ) ያጊሰ።

42 ናዒያ ሶሁቀራ ዴንዳ ኤቃዳ ሃሙታሱ። ኢያ ታማኔ ናሞዑ ላይላ ናዒ። ሄሳን ኣሳይ ዳሮ ማላሌቲዶሶና። 43 ዩሱሲ ሄሳ ኤንቲ ኦዳሰካ ኦዶና ሜላ ኤንታ ሚንሊ ኪቲሰ። ኤንቲ ኢው ሚያባ ኢማና ሜላ ኦዲሰ።

# 6

ዩሱሲ ናዚሬቴን ኢጻቲሰ  
(ማቶ 13:53-58፤ ሉቃ 4:16-30)

1 ዩሱሲ ያፔ ከዩዲ፣ ባ ታማሪታ ካሌሊዲ፣ ባ ካታማ ናዚሬቴ ቢስ። 2 ሳምባታ ጋላስ አይሁዳ ዋሳ ከፋን ታማርሶ ኦይኪስ። ኢ ታማርሶይሳ ሲዲዳ ዳሮ አሳይ ማላሌቲዲ፣ «ሃይሲ ሃ ኡባ አወፔ ደሚዳ? ሃ ጨንጫቴፋ ኢ አወፔ ኤኪዳ? ሃ ማላታታ ኦሊያ ማታ ኢ አወፔ ደሚዳ? 3 ሃይሲ አናዲያ ጊዴኔ? ማይራሚ ናዳ፣ ያይቆባ፣ ዮሳ፣ ዩሁዳኔ ሲሞና እሻ ጊዴኔዬ? ኢያ ሚቼቲ ኑራ ሃይሳን ዴዎኮናዬ?» ያጊዲ፣ ኢ ጊያባ ኤኮና ኢዲዶሶና። 4 ዩሱሲ ሄ አሳኮ፣ «ናቤይ ባ ቢታን፣ ባ ዳቦታኒኔ ባ ሶ አሳን ቦንቼቴናፊ አቲን ሃራታ ማታን ቦንቼቴስ» ያጊስ። 5 ኢ ሄ ቤሳን ባ ኩሺያ ጉፋ አሳ ቦላ ዋሊዲ ፓሊዳይሳፊ አቲን ሃራ ማላታታ ኦፋናው ዳንዳዲቤና። 6 አሳይ አማኒቦና ጊሾ ዳሮ ማላሌቲስ።

**ዩሱሲ ታማኔ ናምዑ ሃዋሬታ ከቲስ**  
(ማቶ 10:5-15፤ ሉቃ 9:1-6)

ሄሳፊ ጉዬ፣ ዩሱሲ ሄ ሄራን ዴዲያ ጉታታን አሳ ታማርሶስ። 7 ዩሱሲ ታማኔ ናምዑ ታማሪታ ባኮ ፀጊዲ፣ ናምዳ ናምዳ ጋሊዲ ከቲስ። ኤንታው ቱና አያናታ ኬሲያ ዋልቃ ኢሚስ። 8 ኤንታ፣ «ኦፔ ፃምዳፊ አቲን ካሊ፣ ካርዲታ፣ ሂንቴ ኪሴን ሚሼ አይቢባካ ኦይኮፊቴ። 9 ሂንቴ ቶሁዋን ጨማ አሊቴ፣ ሺን ናምዑ አፊላ ኦይኮፊቴ» ያጊስ። 10 ቃሲካ፣ «ሂንቴና አሲ ሞኪዳ ሶ አወንካ ጊዲን ሄ ቤሳ ዩዲዲ ባና ጋካናው ሄ ኬፋን ጋምዲቴ። 11 ሂንቴና አሲ ሞኮናሱዋ ዋይኮ ሂንቴ ኦዲያባ ሲዎናሱዋ አወን ጊዲኮካ፣ ሄ ቢታን ዴዲያ አሳስ ሄሲ ናጊሶ ማርካ ጊዳና ማላ ሄ ቤሳፊ ኬዩሼ፣ ሂንቴ ቶሁዋፔ ባና ፒቲቴ» ያጊስ።

12 ታማኔ ናምዑ ታማሪቲ ቢዲ፣ አሳይ ባንታ ናጋራፔ ሲማናዳ ቃላ ኦዲዶሶና። 13 ኤንቲ አሳፔ ዳሮ ቱና አያናታ ኬሲዶሶና። ዳሮ ሃርጋንቸታ ዛይቴ ቲዩዲ ፓሊዶሶና።

**ፃማቂያ ዮሃንሳ ሃይቁዋ**  
(ማቶ 14:1-12፤ ሉቃ 9:7-9)

14 ዩሱሳ ሱንሳይ ኡባ ቤሳን ከዩዳ ጊሾ ካዎይ ሄሮዲሲ ኢያባ ሲዲስ። ኢሲ ኢሲ አሳይ፣ «ፃማቂያ ዮሃንሲ ሃይቆፔ ዴንዲስ፣ ሄሳ ጊሾ ሃ ማላታታ ኦሊይ ኢያ» ያጊዶሶና።

15 ባጋቲ፣ «ሃይሲ ኤሊያሳ ጊዴኔ?» ያጊዶሶና። ሃራቲ ቃሲ፣ «ሃይሲ ቤኒ ዎዴ ናቤታፕ ኢሱዋ ጊዳና አጌና» ያጊዶሶና።

---

6:4 ዮሃ 4:43      6:8 ሉቃ 10:4-11      6:11 ሃ.ኦ 13:51      6:13 ያይ 5:14      6:14 ማቶ 16:14፤ ማር 8:28፤ ሉቃ 9:19

16 ሺን ሄሮዲሲ ሄሳ ሲዒዳ ዎዴ «ሃይሲ ታኒ ቆጲያ ቃንጂሲዳ ፃማቂያ ዮሃንሳ ገዴኔ? ኢ ሃይቆፔ ዳንዲስ» ያገሰ።

17 ሄሮዲሲ ባ ኢሻ ፊልጶሳ ማቸው ሄሮዲያዳ ኤኪዳ ገሾ ኢ ጋሶን ዮሃንሳ ኦይሉዲ ቃሺሲስ። 18 ዮሃንሲ ሄሮዲሳ፣ «ኔኒ ኔ ኢሻ ማቸው ኤካናው ቤሴና» ያገሰ።

19 ሄሮዲያዳ ዮሃንሳ ባ ኡሎን ሞርካዳ ኢያ ዎጲሳናው ኮያሱ፣ ሺን ዳንዳዓቡኩ። 20 ዮሃንሲ ጂሎኔ ጌሻ ኣሲ ገዲዳይሳ ሄሮዲሲ ኤሪዳ ገሾ ኢያው ባቢዲ ሎይሉ ናገሴስ። ሄሮዲሲ ዮሃንሲ ገያባ ሰዓናው ደሲኮካ ኢ ገያባ ሲዒያ ዎዴ ዳር ዳጋሜስ።

21 ሄሮዲሲ ባ ዬሌተዳ ጋላሳ ቦንቻናው ዴሪያ ሃሪይሳታስ፣ ሻላቃታሲኔ ጋሊላን ዴዒያ ገታ ኣሳሰ ኢማቶ ገገሲስ። ሄሲ ሄሮዲያዳሰ ኢንጃ ጋላሰ ገዲስ። 22 ሄሮዲያዳ ናዒያ ኢማላይ ሞኬቲያ ቤሳ ጌላ ዲራዳ፣ ሄሮዲሳኔ ኢያ ኢማላታ ኡፋይሳሱ። ካዎይ ናዒው፣ «ኔ ኮያባ ኣይባ ገዲኮካ ታና ኦይቻ፣ ታኒ ኔው ኢማና» ያገሰ። 23 ቃሲ ኢው ጫቂዳ፣ «ኔኒ ኦይቹያባ ኣይባ ገዲኮካ፣ ታኒ ኔው ኢማና። ሃሪ ኣቶሺን፣ ታ ካዎቴላ ባጋ ገዲኮካ ታኒ ኔው ኢማና» ያገሰ።

24 ናዒያ ካሪ ኬያዳ ባ ኣዬኮ፣ «ኣይ ኢማ ጎ?» ጋዳ ኦይቻሱ። ኢ ኣያ፣ «ፃማቂያ ዮሃንሳ ሁዒያ ኢማ ጋ» ያጋሱ።

25 ናዒያ ኤላሳዳ ካዉዋኮ ባዳ፣ «ፃማቂያ ዮሃንሳ ሁዒያ ሳኔን ዎላዳ ሃዒ ታው ኢማና ሜላ ኮያይስ» ያጋሱ።

26 ያኒን ካዎይ ዳር ቂርቲስ፣ ሺን ባ ኢማላታ ገሾ ኢው ጫቂዳ ባ ጫቂዎ ሚንፋናው ኮዪቤና። 27 ሄሳ ገሾ፣ ኤሌሲዲ ናጌይሳ ዮሃንሳ ሁዒያ ኤሃና ሜላ ከቲስ። ናጌይሲ ቃሾ ከሉ ቢዲ ዮሃንሳ ቆጲያ ቃንጂስ። 28 ሄ ቃንጃቲዳ ሁዒያ ሳኔን ዎሉ ኤሂዲ ናዒስ ኢሚስ። ናዒያ ቃሲ ባ ኣዬሰ ኢማሱ። 29 ዮሃንሳ ታማሬቲ ሄሳ ሲዒዳ ዎዴ ቢዲ ኢያ ኣሃ ኤኪ ኤፊዲ ሞገዶሶና።

**ዬሱሲ ኢቻሹ ሙኩሉ ኣሳ ሙዚስ**  
(ማቶ 14:13-21፤ ሉቃ 9:10-17፤ ዮሃ 6:1-14)

30 ታማኔ ናሞዑ ሃዋሬቲ ሰሚ ዪዲ ኤንቲ ኦሉዳባኔ ታማርሲዳባ ኡባ ዬሱሳሰ ኦዲዶሶና። 31 ኤንታኮ ያ ኣሳይኔ ቢያ ኣሳይ ዳሪዳ ገሾ ዬሱሳራኔ ኢያ ታማሬታራ፣ ሃሪ ኣቶሺን ካሉ ማናዉካ ኤንታ ጋሉና ኢጂስ። ያኒን፣ ዬሱሲ ኤንታኮ፣ «ኑርካ ጉሉ ሸምፒ ኤካናው ኣሲ ባይና ቤሲ ዬጲቲ» ያገሰ። 32 ሄሳ ገሾ፣ ኤንቲ ባንታርካ ዎጎሎን ጌሊዲ ኣሲ ባይና ቤሲ ቢዶሶና።

33 ከንቲ ቢሺን ዳር አሳይ ከንታ ቤዒዲ ኤሪደሶና። ያተን፣ ካታማ ኡባፌ አሳይ ቶሆራ ዋዲ ቢዲ ከንቲ ቢያሱዋ ከንታፌ ሲንፍ ጋኪደሶና። 34 ዩሱሲ ዋጎሉዋፔ ዋዲ ዳር አሳ ቤዒሰ። አሳይ ሃሚያ አሲ ባይና ደርሳ ማላ ጊዲዳይሳ ቤዒዲ ከንታው ቃዲቲዲ ከንታ ዳርባ ታማርሲሰ።

35 ሳዒይ አማርሲያ ዋዴ ዩሱሳ ታማሬቲ ኢያኮ ዩዲ፣ «ሃይሲ ቤሳይ አሲ ባይና ቤሲ፤ ሃዒ ሳዒይካ ቃሚሰ። 36 አሳይ ጉታታኔ ካታማታ ቢዲ ባንታው ሚያባ ሻማና ማላ አሳ ዩዳ» ያጊደሶና።

37 ሺን ዩሱሲ ዛሪዲ ከንታኮ፣ «አሳሰ ሚያባ ሂንቴ አሚቴ» ያጊሰ።

ከንቲ፣ «ኮኒ ቢዲ ናምቡ ዌቲ ዲናሬን ኡይሉ ሻሚዲ አሳ ሙዛና ማላ ኮያይ?» ያጊዲ ኦይቺደሶና።

38 ዩሱሲ ከንታኮ፣ «ሂንቴው አፑን ኡይሉ ዳዒ? ኣኔ ቢዲ ቤዒቴ» ያጊሰ።

ከንቲ ቤዒዲ፣ «ኢቻሹ ኡይሉኔ ናምቡ ሞሎ» ያጊደሶና።

39 ዩሱሲ ባ ታማሬታ አሳ ኡባ ጩጋን ጩጋን ሻኪዲ ማታን ኡቲሳና ማላ ከቲሰ። 40 አሳይ ባጋይ ዌታ፣ ባጋይ ኢሻታማ ጊዲዲ ጩጋን ጩጋን ሻኪቲዲ ኡቲደሶና። 41 ዩሱሲ ኢቻሹ ኡይሳኔ ናምቡ ሞሎታ ኤኪዲ፣ ፑዳ ሳሎ ዌሊዲ ያሳ ጋሳቲሰ። ኡይሳ ማንሉዲ አሳሰ ጊሻና ማላ ባ ታማሬታሰ አሚሰ። ቃሲ ናምቡ ሞሎታ ከንታ ኡባሰ ሻኪሰ። 42 አሳ ኡባይ ሚዲ ካሊደሶና። 43 አቲዳ ኡይሳ ቲፊያኔ ሞሎታ ቲፊያ፣ ኢያ ታማሬቲ ታማኔ ናምቡ ጋይታ ኩሚሉ ዳንሉደሶና። 44 ኡይሳ ሚዳ አዴ አሳ ታይቦይ ኢቻሹ ሙኩሉ።

ዩሱሲ አባ ቦላራ ሃሙቲሰ  
(ማቶ 14:22-33፤ ዮሃ 6:15-21)

45 ኤሌሲዲ ዩሱሲ ባ ታማሬቲ ዋጎሉዋን ጌሊዲ፣ አባፌ ሄፊንላን ዳዒያ ቤቲሳይዳ ባፔ ሲንሳቲዲ ባና ማላ ከቲሰ። ሺን ባው አሳ ሞይዛናው ጉዬ አቲሰ። 46 አሳ ሞይዚዳፔ ጉዬ ያሳ ዋሳናው ዳሪያ ቦላ ከዩሰ።

47 ሳዒይ ቃሚያ ዋዴ ዋጎሎይ አባ ጊደን ዳዒሰ፣ ሺን ዩሱሲ አባፌ ጋዳን ባርካ ዳዒሰ። 48 ጫርኮይ ኢያ ታማሬታኮ ጫርኪያ ጊሹ አባ ፒዶይ ዋይሴይሳ ዩሱሲ ቤዒሰ። ዋንቲማፍ ሳዒይ ጌያና ሃኒያ ዋዴ ኢ አባ ቦላ ሃሙቲሹ ከንታኮ ዩዲ፣ ከንታ ዩጊዲ አዳናው ኮዩሰ። 49 ሺን ኢ አባ ቦላ ሃሙቲሹን፣ ከንቲ



ቤዲዲ፡፡ ከነታው ሞይቲሌ ዳኒን ዋሲደሶና፡፡ 50 ከነቲ ኡባይ ኢያ ቤዲዲ፡፡ ያሻን ኮኮሪደሶና፡፡

ሺን ዩሱሲ ኤሌሲዲ ከነታኮ፡ «ታና፡ ኣይኮይ ባዋ፤ ያዮፊቱ» ያጊሰ፡፡ 51 ዩሱሲ ዋሳሎዋን ጌሊዲ ከነታራ ኢሲፌ ኡቲን ጫርኮይ ዋፑ ጊሰ፡፡ ከነቲ ዳር ማላሌቲደሶና፡፡ 52 ከነታ ዋዛናይ ዜልዑሚዳ ጊሾ ከነቲ ኡይላባ ኣኬኪቦኮና፡፡

**ዩሱሲ ጌንሳሬዌን ሃርጋንቸታ ፓሊስ**

(ማቶ 14:34-36)

53 ከነቲ ኣባ ፒኒዲ፡፡ ጌንሳሬዌ ቢታ ጋኪዲ፡፡ ዋሳሎዋ ጋዓ ሺሺዲ ቃቺደሶና፡፡ 54 ከነቲ ዋሳሎዋፕ ዋዲያ ዋይ ኣሳይ ኤሌሲዲ ዩሱሳ ኤሪደሶና፡፡ 55 ከነቲ ሄራን ዴዲያ ቢታ ኡባን ዋዌሬቲዲ ሃርጋንቸታ ሃላን ቶኪዲ፡፡ «ዩሱሲ ዴዴስ» ጊን ሰዲዳ ቤሳ ኤሂደሶና፡፡ 56 ኣሳይ ኢ ቢዳ ሶ ኡባን፡፡ ጋዓሪያን ጊዲን፡፡ ካታማን፡፡ ዴዲያ ሃርጋንቸታ ዳባባ ኤፎሶና፡፡ ሃርጋንቸቲ ኢያ ኣፊላ ማጫራ ጊዲኮካ ቦቻና ማላ ኣሳይ ኢያ ዋሲደሶና፡፡ ቦቺዳ ኡባይ ፓዒስ፡፡

**7**

**ቤኒ ኣዋታ ዋጋ**

(ማቶ 15:1-9)

1 ዩራሳላማፔ ዩዳ ጉሳ ፋሪሳዌቲኔ ሂጌ ኣሰታማሬቲ ዩሱሳ ማታን ሸቂደሶና፡፡ 2 ዩሱሳ ታማሬታፔ ኢሶቲ ኢሶቲ ጌዮና ኩሺያን፡፡ ሄሲካ ኩሺ ሜጩቶና ካሉ ሜይሳታ ቤዲደሶና፡፡

3 ፋሪሳዌቲኔ ኣይሁዳ ኣሳ ኡባይ ባንታ ኣዋታ ዋጋሶ ባንታ ኩሺያ ሜጩቶና ሞኮና፡፡ 4 ሄሳዳካ፡፡ ከነቲ ጊያፔ ሻሜቲዳባ ሜጩና ዴዲሺ ሞኮና፡፡ ቃሲ ከነቲ ባንታ ኣዋታፔ ኤኪዳ ሃራ ዳር ዋጊ ዴዴስ፡፡ ሄሲካ ሲኒያ፡፡ ኬሪያ፡፡ ቢራታ ሚሼታኔ ኣርሳ ማጪያ ዋጋ ናጌይሳ፡፡

5 ፋሪሳዌቲኔ ሂጌ ኣሰታማሬቲ ዩሱሳ፡፡ «ኔ ታማሬቲ ኣይሰ ኣዋታ ዋጋ ማንሉዲ ባንታ ኩሺያ ሜጩቶና ካሉ ሞና?» ያጊዲ ኦይቺደሶና፡፡

6 ዩሱሲ ከነታኮ፡ «ኢሳያሲ ሂንቴና ጩቦታ፡፡

ሃይሲ ኣሳይ ታና ባ ኢንፃርሳ ፃላላን ቦንቺስ፡፡

ሺን ከነታ ዋዛናይ ታፔ ሃሆን ዴዴስ፡፡

7 አሲ ማዲያ ዋጋ ያሳ ሂጌ ዳኒሲዲ ታማርሲያ ጊሾ ኤንቲ ታና ማላ ጎይናሶና »

ጊዲ ዓፊዲይሲ ቱማ።

8 «ሂንቲ ያሳ ኪታ አጊዲ አሳ ዋጋ ማንሉዲ ናጌታ» ያገሰ።

9 ቃሲካ ዩሱሲ፣ «ሂንቲ ሂንቲ ዋጋ ናጊዲ ያሳ ኪታ ዩጊ አጋናው ሎዎ ኦጌ ዳማዳታ። 10 ሙሴይ፣ ሄ አዋኔ ኔ አደው ቦንቻ፣ ቃሲ ሳ አዋኔ ባ አደው ጫዬይሲ ሃይቃናው ቤሴሰ) ያገሰ። 11 ሺን ኢሲ አሲ ባ አዋ ዋይኮ ባ አደው ማዳናይሳ አጊዲ፣ ሄሲ ያሳ ያርሾ) ገኮ፣ 12 ኢ ባ አዋ ዋይኮ ባ አደው ማዳና ማላ ኦፊታ። 13 ሄሳዳካ፣ ሂንቲ ሃራታ ታማርሲዳ ሂንቲ ዋጋን ያሳ ቃላ ካዲዳታ። ሄሳ ማላ ሃራ ዳርባ ኦፊታ» ያገሰ።

**አሴ ቱኒሲያባታ**  
(ማቶ 15:10-20)

14 ዩሱሲ ዳር አሳ ቃሲካ ባኮ ያገዲ፣ «ኡባይ ታኒ ኦዴይሳ ሲዲቲኔ አኩኩቲ። 15 አሳ ዋዛናፔ ኬያባይ አሴ ቱኒሲሲፔ አቲን ካሬፔ አሳ ኡሎ ጌሊዲ አሴ ቱኒሲያባይ አይቢካ ባዋ። 16 ሲዲያ ሃይሉ ዳዲያ ኦኒካ ሲዎ» ያገሰ።

17 ዩሱሲ ዳር አሳ ዩጊ አጊዲ ሶ ጌሊን ኢያ ታማሬቲ ሄ ለማሰብ ያገዲ ኦይቺዳሶና። 18 ኢ ኤንታኮ፣ «ሂንቲዉካ ቃሲ ጌሊቤኔ? ካሬፔ አሳ ዋዛናን ጌሊያባይ አይቢካ አሴ ቱኒሳናው ዳንዳዎናይሳ አኩኩቲ? 19 አይሰ ገኮ፣ ካሉ አሳ ኡሎ ጊዶ ጌሊዲ ካንሉዲ አዴሲፔ አቲን አሳ ዋዛና ጊዶ ጌሊና» ያገሰ። ሄሳን ዩሱሲ ካሉ ኡባይ ጌሺ ጊዳይሳ ኤሪሲሰ።

20 ካሊዲካ፣ ዩሱሲ፣ «አሳ ቱኒሲያባይ አሳ ዋዛና ጊዶሬ ኬያባ። 21 አሳ ዋዛና ጊዶሬ ኬያባይ ኢታ ቆፋ፣ ላይማቴሉ፣ ካይሶ፣ አሴ ዎጾ፣ ላማ፣ 22 ኢታ አዋ፣ ኢታቴሉ፣ ጌኔ፣ ቃይዳ፣ ጨዋ፣ ቃናቲ፣ ጫሼ፣ ኦቶሮኔ ቦዛቴሉ። 23 ሃ ኢታባይ ኡባይካ አሳ ዋዛና ጊዶሬ ኬዬዲ አሴ ቱኒሴሰ» ያገሰ።

**ኢሲ ማጫሴ አማኑዋ**  
(ማቶ 15:21-28)

24 ዩሱሲ ያፔ ኬዬዲ፣ ዲሮሳ ካታማ ማታን ዳዲያ ቢታ ቢሰ። ኢ ኢሲ ኬሉ ጌሊዲ ያን ዳዲያሳ ኦኒካ ኤራና ማላ ኮዩቤና። ሺን ቆሴቲዲ ጋምናናው ዳንዳዲቤና። 25 ሺን ኢ ጉላ ናዲው ቱና አያናይ ኦይኪዳ ኢሲ ማጫሲያ ዩሱሳባ ሲዳዳ ኤሌሳ ኢያኮ ያዳ ኢያ ቶሁዋ ቦላ ኩንዳሱ። 26 ኢያ አይሁዳ ማጫሲ ጊዲኩ፤

7:10 ኬሳ 20:12፤ ዛሬ 5:16፤ ኬሳ 21:17፤ ለዌ 20:9

ኢያ ዩሌቲዳይ ሲሮፊንቄ ጊያ ቢታና። ኢያ፣ ባ ናዔፔ ቱና ኣያና ኬሳና ማላ ዩሱሳ ዋሳሱ።

27 ሺን ዩሱሲ ዛሪዳ፣ «ናይቲ ኮይሮቲዳ ካላ ካሎ፤ ናይታ ካላ ኤኪዳ ካናታስ ዩጌይሲ ሎዎ ጊዳና» ያገሰ።

28 ማጫሲያ ዛሪዳ፣ «ታ ጎዳው ሄሲ ቱማ፣ ሺን ጋይታ ማታን ዳዒያ ካናቲ ናይታፔ ዎዲያ ቲፊያ ሞሶና» ያጋሱ።

29 ዩሱሲ ቃሲ ኢኮ፣ «ሃ ኔ ቃላ ጊሾ ኔ ሶ ባ፤ ቱና ኣያናይ ኔ ናዔፔ ኬይስ» ያገሰ።

30 ማጫሲያ ባ ሶ ቢያ ዎዴ ቱና ኣያናይ ኢፔ ኬዩን ሂፃን ዚንዒዳሮ ዳማሱ።

**ዩሱሲ ቱሌኔ ሙሚ ኡራ ፓሊስ**

31 ዩሱሲ ፂሮሳ ካታማፔ ኬዩዳ፣ ሲዶናራኔ ታሙ ካታማታ ጊያ ቢታራ ካንሉዳ ጋሊላ ኣባኮ ቢስ። 32 ኣሳይ ቱሌኔ ዋዩዳ ኦዴቲያ ኣሲ ዩሱሳኮ ኤሂዳ፣ ባ ኩሺያ ኢያ ቦላ ዎላና ማላ ኢያ ዎሲዶሶና። 33 ዩሱሲ ባርካ ሄ ኡራ ዳሮ ኣሳፔ ጋፃ ኬሲዳ፣ ባ ቢራዲያ ኢያ ሃይላን ዩዲስ። ቃሲ ጩቲ ጩቲዳ ኢያ ኢንፃርሳ ቦቲስ። 34 ሳሎ ፑዳ ፃሊዳ፣ ቶኪ ሺምፕዳ፣ «ኤፍታህ» ገሰ። ቢርሽላይካ «ዶይታ» ጉሱ። 35 ኡራ ሃይላይ ኤሌሲዳ ዶይቲስ፣ ቃሺቲዳ ኢንፃርሳይካ ቢርሽቲስ፣ ኡራይ ጌሺዳ ኦዴቲስ።

36 ዩሱሲ ኣሳኮ፣ «ሃይሳ ኦዴሰካ ኦዶፕቲ» ያገሰ። ሺን ኢ ዳሮ ሚንሉዳ ኦዶፕቲ ገን፣ ኣሳይ ኦዳ ያ ዳርሲስ። 37 ሄሳ ሲዒዳ ኣሳ ኡባይ ዳሮ ማላሌቲዳ፣ «ኡባባ ኢ ሎይሉ ኦሌስ። ሃሪ ኣቶሺን፣ ቱሊያ ሲሴስ፣ ሙሚያ ኦዲሴስ» ያገደሶና።

**8**

**ዩሱሲ ኦይዳ ሙኩሉ ኣሳ ሙዚስ**

(ማቶ 15:32-39)

1 ጉላ ዎዴፔ ጉዩ፣ ዳሮ ኣሳይ ዩሱሳኮ ሺቂዶሶና። ኣሳስ ሚያባይ ቆዩን ዩሱሲ ባ ታማሬታ ባኮ ፃጊዳ፣ 2 «ሃ ኣሳይ ታራ ሄቩ፣ ጋላስ ጋካናው ጋምዒዳ፣ ኣይኮካ ሚያባ ዳሚቦና ጊሾ ታና ኣሳይ ቃዴሌስ። 3 ታኒ ኣሳ ኮሻራ ሶ ዩዲኮ ኣሳይ ቢሽ ኦጌን ዳቡሪዳ ኩንዳና፣ ባጋ ኣሳይ ሃሆሶፔ ዩደሶና» ያገሰ።

4 ዩሱሳ ታማሬቲ ዛሪዳ፣ «ሃ ባዘ ቢታን ሃ ኣሳ ኡባ ሙዛናው ጊዲያ ካሉ ዳማናው ዳንዳዔይ ኦኔ?» ያገደሶና።

5 ዩሱሲ ኤንታኮ፣ «ሂንቲው ኣፑን ኡይሉ ዳዒ?» ያገዲ ኦይቲስ።

ኤንቲ ዛሪዲ፡ «ላፑን ኡይሊ ዳዔስ» ያጊደሶና።  
 6 ዩሱሲ አሳይ ሳዓን ኡታና ማላ ከቲስ። ያቲዲ፡ ላፑን ኡይላ ኤኪዲ ያሳ ጋላቲ ሰሚዲ ሄ ኡይላ ማንሊዲ፡ አሳስ ገሻና ማላ ባ ታማሬታስ ኢሚስ። ኢያ ታማሬቲ አሳስ ገሺደሶና። 7 ኤንታው ቃሲ ጉላ ላፋ ሞሎቲ ዳዖሶና። ዩሱሲ ሄ ሞሎታ ገሾ ያሳ ጋላቲዲ፡ አሳስ ገሻና ማላ ባ ታማሬታ ከቲስ። 8 አሳይ ኡባይ ሚዲ ካሊደሶና። ኢያ ታማሬቲ አቲዳ ቲፊያ ላፑን ጋይታ ኩሜሊ ዳንሊደሶና። 9 ካላ ሚዳ አሳ ታይቦይ ኦይዲ ሙኩሉ ገደና። ሄሳፌ ጉዬ፡ ዩሱሲ አሳ ዩዲስ። 10 ኢ ቃሲ ባ ታማሬታራ ኤሌሲ ዋሳሎን ጌሊዲ ዳልማኑታ ጊያ ቢታ ቢስ።

**ማላቲ ኦስታና ማላ ኦይቺደሶና**  
 (ማቶ 16:1-4)

11 ፋሪሳዌቲ ዩዲ ዩሱሳ ፓጫናው ኮዪዲ፡ ሳሎፔ ባንታና ማላታ ቤሳና ማላ ዩሱሳራ ፓላማ ኦይኪደሶና።  
 12 ዩሱሲ ቶኪ ሸምፒዲ፡ «ሃ ዋዲያ አሳይ ኦይስ ማላታ ኮዪ? ታኒ ሂንቲው ቱማ ኦይይስ፤ ሃ ዋዲያ አሳስ ኦይ ማላቲካ አሜቲና» ያጊሰ። 13 ኢ ኤንታ ያን ዩጊ አጊዲ ዛሪ ዋሳሎን ጌሊዲ አሳፌ ሄፊንሊ ፒኒስ።

**ፋሪሳዌታኔ ሄሮዲሳ ኢርሹዋ**  
 (ማቶ 16:5-12)

14 ኢያ ታማሬቲ ካሊ ኤፋናይሳ ደጊደሶና፤ ኤንታው ዋሳሎ ጊደን ኢሲ ኡይላፌ ሃሪ ባዋ። 15 ዩሱሲ ኤንታኮ፡ «ሂንቲና ኤሪቲ። ፋሪሳዌታ ኢርሹዋፊኔ ሄሮዲሳ ኢርሹዋፊ ናጌቲቲ» ያጊዲ ከቲስ።  
 16 ኤንቲ ባንታ ጊደን፡ «ኢ ሃይሳ ጌይ ኑስ ኡይሊ ባይና ገሾሳ» ያጊደሶና።  
 17 ዩሱሲ ኤንቲ ጌይሳ ኤሪዲ ኤንታኮ፡ «ሂንቲው ኡይሊ ባይና ገሾ ኦይስ ኦይቲቲ? ሃዒካ ኤሬኬቲ? ዋይኮ ኦኬኬኬቲ? ሂንቲ ዋዛናይ ደጪዳ? 18 ሂንቲው ኦይፊይ ዳዒሺን ቤዔኬቲ? ሃይሊ ዳዒሺን ሲዔኬቲ? ሂንቲ ኦኬኬቲ? 19 ታኒ ኢቻሹ ኡይላ ኢቻሹ ሙኩሉ አሳስ ባሊዳ ዋዳ ኣፑን ጋይታ ኩሜሊ ቲፌ ዳንሊደቲ?» ያጊሰ።  
 ኤንቲካ፡ «ታማኔ ናምዑ ጋይታ ኩሜሊ» ያጊደሶና።

---

8:11 ማቶ 12:38፤ ሉቃ 11:16      8:12 ማቶ 12:39፤ ሉቃ 11:29      8:15 ሉቃ 12:1      8:18 ኤር 5:21፤ ሂዝ 12:2፤ ማር 4:12

20 «ሃሳዳካ፣ ታኒ ላፑን ኡይላ ኦይዲ ሙኩሉ ኣሳሰ ባሊዳ ዋዳ ኣፑን ገይታ ኩሜላ ቲፌ ዳንሊዳት?» ያጊሰ።

ኤንቲ፣ «ላፑን ገይታ ኩሜሊ ዳንሊዳ» ያጊደሶና።

21 ያቲን፣ «ሃዒካ ኣኮኪቤኮት?» ያጊሰ።

**ዩሱሲ ቤቴሳይዳን ኢሲ ቆቂያ ፓሊስ**

22 ኤንቲ ቤቴሳይዳ ካታማ ቢደሶና። ጉላ ኣሳቲ ቆቂ ኡራ ዩሱሳኮ ኤሂዲ ሄ ኡራ ቦቻና ሜላ ኢያ ዋሲደሶና። 23 ዩሱሲ ቆቂ ኡራ ኩሺያ ኦይኪዲ ካታማፔ ጋፃ ኬሲስ። ኢያ ኣይፊያን ጨቲዲ ባ ኩሺያ ኢያ ቦላ ዋሊዲ፣ «ኔው ኣይኮይ ቤንቲ?» ያጊዲ ኦይቺሰ።

24 ኡራይ ቆቂ ጊዲ ያሊዲ፣ «ታው ኣሳይ ቤንቴስ፣ ሺን ኣሳይ ሃሙተሺ ሚሊ ዳኒስ» ያጊሰ።

25 ሃሳፌ ጉዩ፣ ዩሱሲ ዛሪዲ፣ ኡራ ኣይፊያን ባ ኩሺያ ዋሊስ። ኡራይ ሎይሊ ያሊስ፣ ኢያ ኣይፌይ ፓዲስ፣ ኡባባ ጌሺዲ ቤዒስ።

26 ዩሱሲ ኣዲያኮ፣ «ኔ ሶ ባ፣ ሺን ጉታ ጌሎፓ» ያጊዲ ከቲስ።

**ጳዒርሳ ኣማኑዋኔ ማርካቴላ**

(ማቶ 16:13-20፤ ሉቃ 9:18-21)

27 ዩሱሲ ባ ታማሪታራ ቁሳሪያ ፊልጶሳ ማታን ዳዒያ ጉታ ቢስ። ኤንቲ ቢሺን ኦጌ ቦላ ዩሱሲ፣ «ታና ኣሳይ ኦና ጎና?» ያጊዲ ባ ታማሪታ ኦይቺሰ።

28 ኢያ ታማሪቲ፣ «ኢሲ ኢሲ ኣሳይ ኔና፣ <ፃማቂያ ዮሃንሳ> ጎሶና፤ ሃራቲ፣ <ኤሊያሳ ጎሶና> ቃሲ ሃራቲ፣ <ናቤታፔ ኢሱዋ> ጎሶና» ያጊደሶና።

29 ዩሱሲ ኤንታኮ፣ «ያቲን ሂንቴ ታና ኦና ጌቲ?» ያጊዲ ኦይቺሰ።

ጳዒርሲ፣ «ኔኒ ኪሪሰቶሳ» ያጊዲ ዛሪስ።

30 ዩሱሲ፣ «ታባ ኦዴሰካ ኦዶፔቴ» ያጊዲ ኤንታ ከቲስ።

**ዩሱሲ ባና ጋካና ሜቱዋኔ ዋያ ኦዲስ**

(ማቶ 16:21-28፤ ሉቃ 9:22-27)

31 ዩሱሲ ባ ታማሪታኮ፣ «ኣሳ ናባይ፣ ዳሮ ሜቶ ኤካናው ቤሴስ፤ ጨማቲ፣ ካሂኔ ሃላቃቲኔ ሂጌ ኣስታማሪቲ ኢያ ኢፃናው ቤሴስ። ኤንቲ ኢያ ዋቆናውኔ ሂቩ ጋላሳፔ ጉዩ፣ ኢ ሃይቆፔ ዴንዳናው ቤሴስ» ያጊዲ ኤንታ ታማርሲስ። 32 ኢ ሃሳ ኤንታው ጌሺዲ ኦዲስ። ጳዒርሲ ኢያ ኢሲ ባጋ ዛሪዲ ሃንቁስ።

33 ሺን ዩሱሲ ጉዬ ሲሚዲ፣ ባ ታማሪታ ዪሊዲ፣ ጳጳሮሳ ሃንቄቲዲ፣ «ሃ ፃላሂያው፣ ታፔ ሃካ። ኔኒ ኣሲ ደሲያባ ቆፓሳፔ ኣቲን ያሳይ ደሲያባ ቆፓካ» ያገሰ።

ዩሱሳ ካሎይ ባና ካዶ ኦይቼሰ  
(ማቶ 10:38-39፤ 16:24-28፤ ሉቃ 9:23-27፤ 14:26-27)

34 ቃሲካ ዩሱሲ ዳሮ ኣሳኔ ባ ታማሪታ ባኮ ያገዲዲ፣ «ታና ካላናው ኮያ ኦኒካ ባና ካዶ፤ ባ ማሰቃሊያ ቶኪዲ ታና ካሎ።

35 ባ ሺምፑዋ ኣሻናው ኮያ ኡራይ ጳይሳና። ሺን ታ ጊሾኔ ዋንጌላ ጊሾ ባ ሺምፑዋ ጳይሲያ ኡራይ ኣሻና። 36 ኢሲ ኣሲ ሳዓን ዴዒያ ኡባባ ባው ሺሺዲ፣ ባ ሺምፑዋ ጳይሲኮ ኢያ ኣይ ማዳኔ? 37 ኢሲ ኣሲ ባ ሺምፑዋ ዋዛናው ኣይ ኣማናው ዳንዳዒ? 38 ያሳ ኣማናና ሃ ኢታ ዩሌቴላን፣ ኢሲ ኣሲ ታናኒኔ ታ ቃላን ዩላቲኮ፣ ኣሳ ናዓይ፣ ቃሲ ባ ኣዋ ቦንቸን ጌሻ ኪታንቸታራ ያ ዋዴ ኢያን ዩላታና» ያገሰ።

# 9

ዩሱሳ ማላይ ላሜቲሰ  
(ማቶ 17:1-13፤ ሉቃ 9:28-36)

1 ዩሱሲ ኤንታኮ፣ «ታኒ ሂንቴው ቱማ ኦዳይሰ፤ ያሳ ካዎቴላይ ዋልቃራ ዩይሳ ቤዖና ሃይቆና ኢሲ ኢሲ ኣሳቲ ሃይሳን ዴዖሶና» ያገሰ።

2 ዩሱሲ ኡሱፑን ጋላሳፔ ጉዬ፣ ባራ ጳጳሮሳ፣ ያይቆባኔ ዮሃኒሳ ኤኪዲ፣ ኤንታ ፃላላ ጊታ ዴሪያ ቦላ ኬሲዲ ኤንታ ሲንላን ላሜቲሰ። 3 ኢያ ማዖይካ ጳሊሰ፤ ሳዓን ማዖ ሜጨያ ኦኒካ ጌሻናው ዳንዳዖናይሳ ሜላ ዳሮ ቦዒሰ። 4 ሄ ሄዙ ታማሪቲ፣ ኤሊያሲኔ ሙሴይ ዩሱሳራ ኦዴቲሺን ቤዒደሶና።

5 ጳጳሮሲ ዩሱሳ፣ «ኣስታማሪያው፣ ኦኒ ሃይሳን ዴዒይሲ ኦሰ ሎዖ፤ ኦ ሄዙ ሻቃራታ ኢሱዋ ኔው፣ ኢሱዋ ሙሴሰ፣ ቃሲ ኢሱዋ ኤሊያሳሰ ሻቃራና» ያገሰ። 6 ኢያራኔ ሃንኮታራ ዳሮ ያዩዳ ጊሾ ኢ ኣይ ጊያኮካ ኤሪቤና።

7 ሄሳፌ ጉዬ፣ ሻራይ ዩዲ ኤንታ ካሚን ሻራፔ፣ «ሃይሲ ታ ደሲያ፣ ታ ናዓ፣ ኢ ጌይሳ ሲዒቲ» ጊያ ቃላይ ዩሰ። 8 ኤሌሲዲ

---

8:34 ማቶ 10:38፤ ሉቃ 14:27      8:35 ማቶ 10:39፤ ሉቃ 17:33፤ ዮሃ 12:25      9:2 2ጴጊ 1:17-18      9:7 ማቶ 3:17፤ ማር 1:11፤ ሉቃ 3:22

ኤንቲ ዩሺ አሊ ያሊያ ዋዴ ዩሱሳፔ አቲን ሃራ ኦናካ ባንታ ማታን ቤዒቦኮና።

9 ኤንቲ ዳሪያፔ ዋዲሺን፣ ዩሱሲ ኤንታኮ፣ «አሳ ናዓይ፣ ሃይቆፔ ዴንዳና ጋካናው፣ ሂንቲ ቤዒዳባ ኦዳሰካ ኦዶፔቲ» ያጊዲ ከቲሰ።

10 ኢ ከቲዳይሳ ኤንቲ፣ «ኤር» ጊዲ፣ «ሃ ሃይቆፔ ዳንዶ ጌይሲ ዋይጉሴ» ጊዲ፣ ባንታ ጊዶን ኦዳቲዶሶና።

11 ኤንቲ ዛሪዲ፣ «ሂጌ አሰታማሬቲ፣ «ኤሊያሲ ኮይሮቲዲ ያናው ቤሴሰ» አይሰ ጎና?» ያጊዲ ኦይቺዶሶና።

12 ዩሱሲ ዛሪዲ «ኤሊያሲ ኮይሮቲዲ ዩዲ፣ ኡባባ ጊጊሴሰ፤ ያቲን፣ አይሰ ጌሻ ማፃፋይ፣ «አሳ ናዓይ ዳር ዋይታና ኢፃታና» ያጊ ጊዲ ኦይቺሰ። 13 ሺን ታኒ ሂንቲው ኦዳይሰ፤ ኤሊያሲ ዩሰ፤ ቃሲ ኢያባይ ጌሻ ማፃፋን ፃፊቲዳይሳዳ፣ አሳይ ኢያ ቦላ ባንታ ኮዩዳባ ኦሊዶሶና» ያጊሰ።

**ዩሱሲ ቱና አያናይ ኦይኪዳ ናዓ ፓሊሰ**  
(ማቶ 17:14-21፤ ሉቃ 9:37-43)

14 ዩሱሲ፣ ጳዳርሲ፣ ያይቆቢኔ ዮሃኒሲ ሃንኮ ኢያ ታማሬታኮ ሲሚዲ ያ ዋዴ ዳር አሳይ ኤንታ ዩሹዋን ኤቁዳይሳታኔ ሂጌ አሰታማሬ ጊዲዳ ጉላ አሳቲ ኤንታራ ፓላማይሳ ቤዒዶሶና። 15 ሄ ዳር አሳይ ዩሱሳ ቤዒዳ ዋዴ ማላሌቲዲ፣ ኤሌሲዲ ኢያኮ ዋዲ ዩዲ፣ ኢያ ሳርሊዶሶና። 16 ዩሱሲ ባ ታማሬታኮ፣ «ኤንታራ አይ ፓላማቲ?» ያጊዲ ኦይቺሰ።

17 ሄ ዳር አሳ ጊዶፊ ኢሲ ኡራይ ዛሪዲ፣ «አሰታማሬያው፣ ታ ናዓ ቦላ ኦዳቲሊ ዲጊያ ቱና አያናይ ዳዒያ ጊሾ ኢያ ኔኮ ኤካዳ ያሰ። 18 ሃ ቱና አያናይ ኢያ ኦይኪያ ዋዴ ኡባን፣ ኢያ ሾጩ ዩጌሰ፤ ኢያ ዶናራ ጎፖንቶይ ዩሰ፤ ቃሲ አቺ ጋርጩሴሰ፤ አሳቲላካ ሚኔሰ። ኢያፔ ሃ ቱና አያና ኬሳና ማላ፣ ኔ ታማሬታሰ ኦዳሰ፣ ሺን ኬሳናው ዳንዳዒቦኮና» ያጊሰ።

19 ዩሱሲ ዛሪዲ ኤንታኮ፣ «አማናና ሃ ዋዲያ አሳው! ታኒ ሂንቲራ አዉዴ ጋካናው ዳኔ? ቃሲ ሂንቲና አዉዴ ጋካናው ዳንዳዒኔ? ናዓ ታኮ ሃ ኤኪ ዩቲ» ያጊሰ። 20 ኤንቲ ናዓ ኢያኮ ኤሂዶሶና፤ ሄ ቱና አያናይ ዩሱሳ ቤዒዳ ማላ ናዓ ኮኮርሲሰ፤ ናዓይ ሳዓን ከንዲዲ፣ ዶናራ ጎፖንቶይ ቶፋ ጊሺን ጎንዶሬቲሰ። 21 ዩሱሲ ሄ ናዓ አዋኮ፣ «ሃይሲ ኔ ናዓ ኦይኮሳፔ አይ ማላ ዋዴ ጊዳኔ?» ያጊዲ ኦይቺሰ።

ናዓ አዋይ፡ «ኢ ጉላን ዳዒሺን ኦይኪስ። 22 ኢያ ዋቋናው ዳር ዋዴ ታማኒኔ ሃላን ዩጌስ፡ ሺን ኔ ዳንዳዒኮ፡ ኑስ ቃዴታርኪ፡ ኑና ማዳርኪ» ያገሰ።

23 ዩሱሲ ኢያ፡ « ኔኒ ዳንዳዒኮ ጋይ? » አማኒያ ኦዴስካ ኡባባይ ዳንዳዒቲስ» ያገሰ።

24 ኤሌሲዲ ናዓ አዋይ ባ ቃላ ቋቁ ኦሊዲ፡ «ታኒ አማናይስ፡ ሺን ጉጃ አማናናዳ ታና ማዳርኪ» ያገሰ።

25 ዩሱሲ አሳይ ዳሪ ዳሪ ቤይሳ ቤዒዲ፡ ቱና አያና፡ «ሃ ቱሌኔ ሙሜ አያናው፡ ሃ ናዓፔ ኬያ ጋዳ ኔና ታ ኪታይስ፤ ቃሲ ናምዓንሶ ኢያን ጌሎፓ» ያገሰ።

26 ሄ ቱና አያናይ ዋሲዲ፡ ናዓ ዳር ኮኮርሲዲ፡ ኢያፔ ኬዩስ። ናዓይ ሃይቁዳ ዳኒን፡ ዳር አሳይ፡ «ናዓይ ሃይቁስ» ያገደሶና።

27 ሺን ዩሱሲ ናዓ ኩሺያ ኦይኪዲ ዳንሊን፡ ናዓይ ዳንዲ ኤቁስ።

28 ዩሱሲ ሶ ጌሊዳይሳፊ ጉዬ ኢያ ታማሬቲ፡ «ኑኒ ሄ ቱና አያና ኬሳናው አይስ ዳንዳዒቦኮ?» ያገዲ ዩሱሳ ዲማ ኦይቺደሶና።

29 ዩሱሲ ዛሪዲ፡ «ሄሳ ሜላይ ዋሳፔኔ ጾማፔ ኣቲን ሃራባን ኬያናው ዳንዳዒና» ያገሰ።

**ዩሱሲ ባና ጋካና ሜቱዋ ዛሪ ኦዲስ**  
(ማቶ 17:22-23፤ ሉቃ 9:43-45)

30 ኤንቲ ሄ ቤሳፊ ዳንዲዲ፡ ጋሊላራ አዲዲ ቢደሶና፤ ዩሱሲ ባ ዳዒያሱዋ ኦኒካ ኤራና ሜላ ኮዩቤና። 31 ኢ ባ ታማሬታኮ፡ «አሳ ናዓ፡ አሲ አሳስ አሊ ኢማናኔ ዋቋና፤ ኢ ሄኹ ጋላሳፔ ጉዬ፡ ሃይቆፔ ዳንዳና» ያገዲ ታማርሴስ።

32 ሺን ኤንታው ኢ ጌይሲ ጌሊቤና፤ ቃሲ ኢያ ኦይቻናወካ ያዩደሶና።

**ኡባፊ አዲይ ኦኔ?**  
(ማቶ 18:1-5፤ ሉቃ 9:46-48)

33 ኤንቲ ቁፊርናሆሜ ካታማ ቢዲ ሶ ጌሊዳይሳፊ ጉዬ ዩሱሲ ኤንታኮ፡ «አጌን አይ ኦዴቲቲ?» ያገዲ ኦይቺስ። 34 ሺን ኤንቲ፡ «ኑ ገደን ኡባፊ አቋናይ ኦኔ?» ያገዲ ፓላሚዳ ገሾ ሲዒ ገደሶና። 35 ዩሱሲ ኡቲዲ፡ ታማኔ ናምቡ ታማሬታ ጭገዲ፡ «ኦኒካ ሲንሐ አቋናው ኮይኮ፡ ኡባፊ ጉዬ አዲዲ፡ ኡባስ አይሌ ገዳናው ቤሴስ» ያገሰ።

36 ኢሲ ጉላ ናዓ ኤኪዲ፡ ኤንታ ገደን ኤሲስ፤ ሄ ጉላ ናዓ ኢዲሚዲ ኤንታኮ፡ 37 «ሃይሳ ሜላ ጉላ ናይታፔ ኢሱዋ ታ ሱንላን



ሞኪያ ኦሪካ ታና ሞኬሰ፤ ቃሲ ታና ሞኪያ ኦሪካ ታና ከቲዳይሳካ ሞኬሲፔ ኦቲን ታ ፃላላ ሞኬና» ያገሰ።

ኑና ኢዳና ኡራይ ኑ ባጋ  
(ሉቃ 9:49-50)

38 ዮሃንሲ፡ «ኣስታማሪያው፡ ኢሲ ኣሲ ኑ ሱንላን ቱና ኣያናታ ኬሲሺን ኑኒ ቤዒዲ፡ ኑ ባጋ ጊዳና ገሾ ኢያ ዲጊዳ» ያገሰ።

39 ሺን ዩሱሲ፡ «ኦሪካ ታ ሱንላን ያሳይ ኦሊያ ማላታታ ኦሊዲ፡ ኤሌሲዲ ታ ቦላ ኢታባ ኦዳታናው ዳንዳዔይ ባይና ገሾ ዲሳፊቴ። 40 ኑባ ኢዳና ኡራይ ኑ ባጋ። 41 ታኒ ሂንቴው ቱማ ኦዳይሰ፤ ሂንቴ ታይሳታ ጊዲያ ገሾ ኦሪካ ሂንቴው ታ ሱንላን ሃሎ ሃላ ኡያናው ኣሚኮካ፡ ባ ዎይቱዎ ኤካና።

ናጋራን ፓጩቴላ  
(ማቶ 18:6-9፤ ሉቃ 17:1-2)

42 «ታና ኣማኒያ ሃ ጉላታፔ ኢሱዋ ባሌሊያ ኦሪካ፡ ጋቻ ዎጋ ዎፃ ባ ቆዴን ቃቺዲ፡ ኣባን ዉሊያኮ ኢያው ሎዎ። 43-44 ኔ ኩሽይ ኔና ባሌሊኮ፡ ቃንፃ ሆላ። ኔኒ ናሞዑ ኩሽራ ቶዶና ጋናሜ ታማን ዩጌቴይሳፊ፡ ዱፃ ኩሽራ ዳዑዋ ጌሎይ ኔው ሎዎ። 45-46 ኔ ቶሆይ ኔና ባሌሊኮ፡ ቃንፃ ሆላ። ኔኒ ናሞዑ ቶሆዋራ ጋናሜ ታማን ዩጌቴይሳፊ፡ ዎቤ ጊዳዳ ዳዑዋ ጌሌይሲ ኔው ሎዎ። 47 ኔ ኣይፊይ ኔና ባሌሊኮ፡ ዎጫ ኬሳ ሆላ። ኔኒ ናሞዑ ኣይፊያራ ጋናሜ ታማን ዩጌቴይሳፊ፡ ኢሲ ኣይፊያራ ያሳ ካዎቴላ ጌሌይሲ ኔው ሎዎ። 48 ያን ኤንታ ሚያ ጉፁኔይ ሃይቁና፡ ታማይካ ቶዔና።

49 «ያርሾይ ማፂኔን ጌዩይሳ ሜላ ኣሲ ኡባይ ታማን ሃርቁታና። 50 ማፂኔይ ሎዎ፡ ሺን ኢ ማልዶና ኢፂኮ፡ ዛሪዲ ዋቲ ማልዔላኔ? ሂንቴናን ማፂኔይ ዳዎ። ያኒዲ ኢሶይ ኢሱዋራ ሳርቴላን ዳዒቴ» ያገሰ።

# 10

ማቾ ዩዳናው ቤሴና  
(ማቶ 19:1-2፤ ሉቃ 16:18)

---

9:37 ማቶ 10:40፤ ሉቃ 10:16፤ ዮሃ 13:20      9:40 ማቶ 12:30፤ ሉቃ 11:23      9:41 ማቶ 10:42      9:43-44 ማቶ 5:30      9:47 ማቶ 5:29  
9:48 ኢሳ 66:24      9:50 ማቶ 5:13፤ ሉቃ 14:34

1 ዩሱሲ ሄሳፌ ዳንዲዲ፣ ዩሁዳ ቢታ ቢዲ ዮርዳኖሴ ሻፋ ፒኒስ። ዳሮ አሳይ ዛሪዲ ኢያኮ ሸቁን፣ ካሴይሳዳካ ሄ አሳ ታማርሲስ።

2 ኢሲ ኢሲ ፋሪሳዌቲ ፓጫናው ኮዩዲ ዩሱሳ፣ «ኢሲ አሲ ባ ማቺው ዩዳና ሜላ ሙሴ ሂጌይ ከቲ?» ያገዲ ኢያ ኦይቺደሶና።

3 ኢ ዛሪዲ፣ «ሙሴይ ሂንቴና ዎይገዲ ከቲዴ?» ያገሰ።

4 ኤንቲ፣ «ሙሴይ፣ <ኢሲ አሲ ባ ማቺስ አንጆ ዎርቃቲ ኢሚዲ ዩዶ> ገሰ» ያገደሶና።

5 ዩሱሲ ዛሪዲ፣ ኤንታ «ሂንቴ ኦዲን ሲዖናይሳታ ገዲያ ገሾ ሙሴይ ሃ ከታ ሂንቴው ፃፊስ። 6 ሺን ያሳይ ኮይሮ ሜዲያ ዎዴ አዴኔ ማጫ ኦሲዲ፣ ኤንታ ሜዲስ። 7 ሄሳ ገሾ፣ ኢሲ አሲ ባ አዎኔ ባ አዩው አገዲ፣ ባ ማቺራ ኢሲፌ ዳዔስ። 8 ኤንቲ ናምዓይ ኢሲ አሴ ገደሶና፤ ሂዛፔ፣ ኤንቲ ኢሲ አሴ ገደሶናፔ አቲን ናምዑ አሲ ገደኮና። 9 ሄሳ ገሾ፣ ያሳይ ኢሲፌ ቃቺዳይሳ አሲ ሻኮፎ» ያገሰ።

10 ኤንቲ ሶ ሲሚዳ ዎዴ ኢያ ታማሬቲ ሃ ኦዳባ ዩሱሳ ናምዓንላ ኦይቺደሶና። 11 ዩሱሲ ኤንታኮ፣ «ባ ማቺው ዩዲዲ ሃራ ኤኪያ ኦኒካ ላይማቴስ። 12 ቃሲ ማጫሲያካ ባ አዚናፔ ኬያዳ ሃራ አዚና ጌሊኮ ላይማታዉሱ» ያገሰ።

**ዩሱሲ ጉላ ናይታ አንጂስ**  
(ማቶ 19:13-15፤ ሉቃ 18:15-17)

13 ዩሱሲ ጉላ ናይታ ቦቻና ሜላ፣ ኢሲ ኢሲ አሳይ ናይታ ኢያኮ ኤሆሶና፣ ሺን ኢያ ታማሬቲ ሄ አሳ ሃንቁቲደሶና። 14 ዩሱሲ ሄሳ ቤዒዲ፣ ባ ታማሬታ ሃንቁቲዲ፤ ኤንታኮ፣ «ጉላ ናይቲ ታኮ ዩይሳ ዲሳፊቲ፤ ያሳ ካዎቴላይ ሃይሳታ ሜላሳ። 15 ታኒ ሃንቴው ተማ ኦዲይስ፤ ያሳ ካዎቴላ ጉላ ናዓዳ ኤኮና ኡራይ ኦኒካ ሄ ካዎቴላ ኡባራካ ጌሊና» ያገሰ። 16 ጉላ ናይታ ኢዲሚዲ፣ ባ ኩሺያ ኤንታ ኢሱዎ ኢሱዎ ቦላ ዎሊዲ አንጂስ።

**ሚሼ ሲቆይ ኤሂያ ሜቱዎ**  
(ማቶ 19:16-30፤ ሉቃ 18:18-30)

---

10:4 ዛሬ 24:1 10:6 ሜዴ 1:27፤ 5:1 10:7 ሜዴ 2:24 10:11 ማቶ 5:32፤ 1ቆሮ 7:10-11 10:15 ማቶ 18:3

17 ዩሱሲ ባናው ከዩዳ ዋዴ ኢሲ ኡራይ ዋዴ ዩዲ፥ ኢያ ሲንላን ጉልባቲዲ፥ «ከሃ አስታማሪያው፥ ሜሪና ዴቦብ ላታናው ታኒ አይ ኦሶ?» ያጊዲ ኦይቸሰ።

18 ዩሱሲ፥ «አይሰ ታና ከሃው ጋዳ ጭጋይ? ያሳ ፃላላፔ አቲን ሃሪ ከሃ ኦኒካ ባቆ። 19 ያሳ ኪታ፥ ዋዶፓ፤ ላይማቶፓ፤ ካይሶቶፓ፤ ዋርዶ ማርካቶፋ፤ ኢንፃርሳን ጨሞፋ፤ ኔ አዋኔ ኔ አዪው ቦንቻ ያጌይሳ ኤራሳ» ያጊሰ።

20 ኡራይ፥ «አስታማሪያው፥ ታኒ ሃሳ ኡባ ናባቴላፌ ዶማዳ ሃላ ጋካናው ናጋይሰ» ያጊሰ።

21 ዩሱሲ ኡራ ቲሺ ኦላ ጭሊዲ ዶሲሰ፤ «ኔው ኢሲባይ ፓጩሰ፤ ባዳ ኔው ዴዒያባ ኡባ ባይዛዳ፥ ሄ ሚሺያ ማንቆታሰ አማ፤ ኔኒ ሳሎን ዲሬታና፥ ያታ ሲማዳ ታና ካላ» ያጊሰ። 22 ሺን ኡራይ ሃሳ ሲዒዲ፥ ኢ ዳር ዲሬ ጊዲያ ጊሾ ባ ሶሞቦ ካሬሴሰ፥ ኡፋይቶና አጊዲ ቢሰ።

23 ዩሱሲ ባ ታማሪታ ዩሺ አላ ጭሊዲ፥ «ዲሬ አሲ ያሳ ካዋቴላ ጌላናይሲ ዋኒዲ ሜታንዴሻ!» ያጊሰ።

24 ኢያ ታማሪቲ ኢያ ቲሚርቲያ ሲዒዲ ማላሌቲዶሶና። ሺን ዩሱሲ ቃሲካ ኤንታኮ፥ «ናይቶ፥ ያሳ ካዋቴላ ጌላናይሲ ዋኒዲ ሜታንዴሻ! 25 ዲሬ አሲ ያሳ ካዋቴላ ጌላናይሳፌ፥ ጊማሌይ ናርፔ ሉሆራ አዴይሲ ካዉዬሰ» ያጊሰ።

26 ኢያ ታማሪቲ ማላሌቲዲ፥ «ያቲን፥ ኦኒ አታኔ?» ያጊዲ፥ ኢሶይ ኢሱብ ኦይቸዶሶና።

27 ዩሱሲ ኤንታ ቲሺ ኦላ ጭሊዲ፥ «ሃይሲ ያሳሰ ዳንዳዔቴሰፔ አቲን አሳሰ ዳንዳዔቴና፤ ያሳሰ ኡባባይ ዳንዳዔቴሰ» ያጊሰ።

28 ጳዳርሲ ዩሱሳኮ፥ «ሃኮ፤ ኦኒ ኦባ ኡባ አጊዲ፥ ኔና ካሊዳ» ያጊሰ።

29 ዩሱሲ «ታኒ ሃንቴው ቱማ ኦዳይሰ፤ ታ ጊሾኔ ዋንጌላ ጊሾ ከላ ዋይኮ ኢሻታ ዋይኮ ሚቼታ ዋይኮ አዋ ዋይኮ አዪው ዋይኮ ማቸው ዋይኮ ናይታ ዋይኮ ጋዲያ አጊዳይ ኦኒካ፥ 30 ሃላ ሃ ዋዲያን ጭ ኩሼ ከላ፥ ኢሻታ፥ ሚቼታ፥ አዬታ፥ ናይታ፥ ጋዲያ፥ ጌዴታፊ ኢሲፌ ኤካና። ሲንሳፌ ያና ዋዲያንካ ሜሪና ዴቦብ ኤካና። 31 ሺን ዳርቲ ሃላ ዴላን ሲንሴ ጊዲዳይሳቲ ጉዬ ጊዳና፥ ቃሲ ዳርቲ ሃላ ጉዬ ጊዲዳይሳቲ ሲንሴ ጊዳና» ያጊሰ።

ዩሱሲ ባና ጋካና ሜቱዋ ሃሻንሉ ኦዲሰ  
(ማቶ 20:17-19፤ ሉቃ 18:31-34)

32 ዩሱሳራኔ ኢየ ታማሪታራ ዩሩሳላሜ ቢሺን፣ ዩሱሲ ባ ታማሪታ ሲንላን ሃሙቴስ። ኤንቲ ማላሌቲዶሶና። ኢየ ካሊይሳቲካ ያዪዶሶና። ናምዓንሉ፣ ታማኔ ናምዑ ታማሪታ ጋፃ ኬሲዲ፣ ባና ጋካናባ ዲማ ኤንታው ሃይሳዳ ያጊዲ ኦዲስ።  
 33 «ሄኮ፣ ኩኒ ዩሩሳላሜ ሃዲ ኬዮስ። ያን አሳ ናዓይ፣ ካሂኔ ሃላቃታሲኔ ሂኔ አስታማሪታስ አሊ አሜታና። ኤንቲ ኢየ ቦላ ሃይቆ ፐርዳ ፐርዳና፤ ቃሲ አይሁዳ ጊዶና ዳሪያስ ኢየ አሊ አማና። 34 ሄ አይሁዳ ጊዶና ዳሪይ ኢየ ቶቻና፣ ኢየ ቦላ ጩታና፣ ሊሶን ጋራፋናና ዎቶና። ኢ ሄኸ፣ ጋላሳፔ ጉዬ፣ ሃይቆፔ ዳንዳና» ያጊስ።

**ያይቆቤኔ ዮሃንሲ ዎሲዳ ዎሳ**  
 (ማቶ 20:20-28)

35 ዛብዲዮሳ ናይቲ ያይቆቤኔ ዮሃንሲ ዩሱሳኮ ዩዲ፣ «አስታማሪያው፣ ኩኒ ኔና ዎሲያ ኢሲባ ኑስ ኦላርኪ» ያጊዶሶና።

36 ዩሱሲ ኤንታኮ፣ «ታኒ ሂንቲው አይ ኦሎ?» ያጊስ።

37 ኤንቲ፣ «ኔኒ ኔ ቦንቾ ካዎቴላን ኡቲያ ዎዴ ኑፔ ኢሱዎ ኡሻቻ ባጋራ ቃሲ ኢሱዎ ሃዲርሳ ባጋራ ኡቲሳርኪ» ያጊዶሶና።

38 ሺን ዩሱሲ ኤንታኮ፣ «ሂንቲ አይ ዎሲያኮ ኤሪኬታ፣ ታ ኡያናው ዳዒያ ፀዓ ኡያናው ዳንዳዔቲ? ቃሲ ታኒ ፃማቁታናው ዳዒያ ዊንቃቲያ ፃማቁታናው ዳንዳዔቲ?» ያጊስ።

39 ኤንቲ ዛሪዲ፣ «ኤ ዳንዳዎስ» ያጊዶሶና።

ዩሱሲ ቃሲ፣ «ቱማካ ታ ኡያናው ዳዒያ ፀዓ ሂንቲ ኡያና፣ ታኒ ፃማቁታናው ዳዒያ ዊንቃቲያ ሂንቲ ፃማቁታና። 40 ሺን ታፔ ኡሻቻ ባጋራኔ ሃዲርሳ ባጋራ ኡታናይሳታ ዶራናው ታው ማቲ ባዎ፣ ሺን ሄ ቤሳይ ያሳይ አማናው ጊጊሲ ዎሊዳይሳታሳ» ያጊስ።

41 ሃንኮ ታሙ ታማሪቲ ሄሳ ሲዒዳ ዎዴ ያይቆቤኔ ዮሃንሳ ሃንቁቲዶሶና። 42 ዩሱሲ ኤንታ ኡባ ባኮ ዪጊዲ፣ «አይሁዳ ጊዶና አሳ ሃላቃቲ ዳሪያ ሃሪይሳታ ጌቴቲዲ ዪጌቴይሳኔ ሃሪይሳታስ ዳሪያ ቦላ ማቲ ዳዒይሳ ሂንቲ ኤሪታ። 43 ሺን ሂንቲ ጊዶን ሄሳ ማላ ጊዶና፤ ሂንቲ ጊዶን ጊታታናው ኮዬይ ኦኒካ ሂንቲው አይሌ ጊዳናው ቤሴስ። 44 ቃሲ ሂንቲ ጊዶን ኡባሬ ቦላ ጊዳናው ኮዬይ ኦኒካ ሂንቲ ኡባስ አይሌ ጊዳናው ቤሴስ። 45 ሃሪ ኦቶሺን፣ አሳ ናዓይካ፣ አሳስ ኦላናው ዳርታ ዎዛናው ባ ሺምቸዎ አሊ አማናው ዩሲፔ ኦቲን አሲ ኢየው ኦላና ማላ ዩቤና» ያጊስ።

---

10:38 ሉቃ 12:50      10:42 ሉቃ 22:25-26፤ ማቶ 23:11፤ ማር 9:35፤ ሉቃ 22:26

ዩሱሲ ቆቂያ ባርዲሞሳ አይፊያ ፓሌስ  
(ማቶ 20:29-34፤ ሉቃ 18:35-43)

46 ኤንቲ ኢያርኮ ካታማ ቢደሶና። ዩሱሲ ባ ታማሬታራኔ ዳሮ አሳራ ኢያርኮፊ ኬዩሺን፣ ዲሞሳ ናዓይ፣ ቆቂይ፣ ባርዲሞሳ ጌቲቲይሲ፣ ኦጌ ጋፃን ዎሲሼ ኡቲስ። 47 ባርዲሞሲ፣ ያራ አዴይ ናዚሬቲ ዩሱሳ ጊዲዳይሳ ሲዒዳ ዎዴ ባ ቃላ ቶቁ ኦሊዲ፣ «ዳዊቲ ናዓ ዩሱሳ፣ ታና ማራርኪ!» ያጉሱ ኦይኪስ።

48 ዳሮ አሳይ ኢያ፣ «ሃይዛ!» ጊዲ ሃንቁቲደሶና።

ሺን፣ ኢ ባ ቃላ ካሴይሳፊ ዳሮ ቶቁ ኦሊዲ፣ «ዳዊቲ ናዓው፣ ታና ማራርኪ!» ያገሰ።

49 ዩሱሲ ኤቂዲ፣ «ኢያ ሃ ፃጊቲ» ያገሰ።

ኤንቲ ቆቂያኮ፣ «አይኮይ ባዋ፣ ዴንዳ ኤቃ፣ ኔና ፃጊስ» ያገደሶና። 50 ቆቂይ ባ ማዑዋ ሆሊ ዩጊዲ፣ ጉፒ ዴንዲ ኤቂዲ፣ ዩሱሳኮ ቢስ።

51 ዩሱሲ፣ «ታኒ ኔው አይ ኦላና ማላ ኮያይ?» ያገሰ።

ቆቂይ፣ «አስታማሪያው፣ ታ ፃላናው ኮያይስ» ያገሰ።

52 ዩሱሲ ኢያ፣ «ባ፣ ኔ አማኖይ ኔና ፓሌስ» ያገሰ። ሶሁዋራካ ኢያ አይፊይ ፃለን፣ ዩሱሳ ካሊስ።

# 11

ዩሱሲ ጊታ ቦንቾን ዩሩሳላሜ ጌሊስ

(ማቶ 21:1-11፤ ሉቃ 19:28-40፤ ዮሃ 12:12-19)

1 ኤንቲ ዩሩሳላሜ ማቲሼ፣ ሻማሆ ዴሪያ ማታን ዴዒያ ቤቲፋጌኔ ቢታኒያ ካታማታ ጋኪደሶና። ዩሱሲ ባ ታማሬታፔ ናምዓታ ሲንሌ ከቲዲ፣ 2 «ሂንቲፊ ሲንላን ዴዒያ ጉታ ቢቲ፤ ያ ጌሊዳ ማላ ኦኒካ ቶጊቦና ቃሾን ዴዒያ ሃሬ ማሪ ሂንቲ ዴማና፣ ኢያ ቢሊዲ፣ ሃ ኤኪ ዩቲ። 3 ኦኒካ ሂንቲና፣ ሃይሳ አይስ ኦላቲ?» ያገዲ ኦይቸኮ፣ «ሳዳይ ኢያ ኮዩስ፣ ኤሌሲዲ ሃ ዩዳና» ያገሰ።

4 ኤንቲ ቢዲ፣ ሃሬ ማሪ ካሬ ቦላ ኦጌ ማታን ቃሾቲዲ ዴዒይሳ ዴሚዲ ቢሊደሶና። 5 ሄ ቤሳን ኤቂዳ ኢሲ ኢሲ አሳቲ ኤንታኮ፣ «ሃሬ ማሪ ዋታናው ቢሌቲ?» ያገደሶና። 6 ኢያ ታማሬቲ ዩሱሲ ባንታና ከቲዳይሳ ኦዲን፣ አሳቲ ዩዲ አገደሶና። 7 ኤንቲ ሃሬ ማራ ዩሱሳኮ ኤሂዲ፣ ባንታ ማዑዋ ኢያ ዘኮን ሂዲን ዩሱሲ ሄ ሃሬ ማራ ቶጊስ። 8 ዳሮ አሳይ ባንታ ማዑዋ ኦጊያን ሂዲደሶና፤ ቃሲ ሃራቲ ሚላ ታሽ ታሽዲ፣ ኦጌን ሂዲደሶና። 9 ዩሱሳፔ ሲንላራ ሃሙቲያ አሳይኔ ኢያ ካሊያ አሳይ ባንታ ቃላ ቶቁ ኦሊዲ፣

«ሆሳና! \* ያሳይ ጋላቴቶ!  
 ጎዳ ሱንላን ዬይሲ አንጃቴዳይሳ።  
 10 ጎዳ ሱንላን ያ ኑ አዋ  
 ዳዊቴ ካዎቴላይ አንጃቴዳይሳ።  
 ኡባፌ ቦላ ሳሉዋን  
 ዳዒያ ያሳይ ጋላቴቶ»  
 ያጊደሶና።

11 ዬሱሲ ዬሩሳላሜ ቢዲ፣ ያሳ ከላ ጌሊሰ። ቃሲ ኡባባ ዩዩ ዪሊዳፔ ጉዩ፣ ሳዓይ ቃሚያ ጊሾ ታማኔ ናምዑ ታማሬታራ ቢታኒያ ካታማ ቢሰ።

ዬሱሲ ቃንጊዳ ባላሴ ሚሊው  
 (ማቶ 21:18-19)

12 ዋንቴላ ጋላሰ ኤንቲ ቢታኒያፔ ከዪዲ ቢሺን፣ ዬሱሲ ኮሻቲሰ። 13 ሃሆን ኢሲ ባላሴ ሚሊው ሃይላ ዓላላ ማዓ ኡቴዳር ቤዒዲ፣ ኢ ቦላ አይፊይ ቤቴኮ ጊዲ፣ ቤዓናው ኢኮ ቢሰ፣ ሺን ኢኮ ኢ ቢያ ዋዴ ሃይላ ዓላላፔ አቲን ኢሲ አይፊካ ዳሚቤና፤ አይሰ ገኮ፣ ባላሴይ አይፊያ ዋዴይ ጋኪቤና። 14 ዬሱሲ ሄ ባላሲው፣ «ሂዛ፣ ኔፔ ሜሪናው አሲ አይፊ ሞፖ» ያጊሰ። ኢያ ታማሬቲ ኢ ጌይሳ ሲዒደሶና።

ዬሱሲ ያሳ ከላን ዘልዔይሳታ ከሲሰ  
 (ማቶ 21:12-17፤ ሉቃ 19:45-48፤ ዮሃ 2:13-22)

15 ኤንቲ ዬሩሳላሜ ቢደሶና፤ ዬሱሲ ያሳ ከላ ጌሊዲ፣ ያን ባይዜይሳታኔ ሻሚይሳታ ካሬ ጎዶ ኦይኪሰ፤ ቃሲ ሚሼ ላሚይሳታ ዓርጸዛኔ ሆሌ ባይዜይሳታ ኦይዲያ አሊ ዬጊዲ፣ 16 አሲ አይቢባካ ቶኪዲ፣ ያሳ ከላ ጊደራ አቶና ሚላ ዲጊሰ። 17 ዬሱሲ አሳ ሃይሳዳ ያጊዲ ታማርሲሰ። «ጌሻ ማፃፋን፣ ታ ከላይ አሲ ኡባይ ያሳ ዋሲያ ከሊ ጊዳና ጌቴቲዲ ዓፊቲሰ። ሺን ሂንቴ ኢያ ፓንጋቲ ቆሴቲያ ጎንጎሎ ኦሊዴታ» ያጊሰ።

18 ካሂኔ ሃላቃቲኔ ሂጌ አሰታማሬቲ ሄሳ ሲዒዲ፣ ኢያ ዋቆናው ኦጌ ኮሺ ኦይኪደሶና። ሺን ዳር አሳይ ኢያ ቲሚርቲያን ማላሌቲያ ጊሾ ኢያው ያዩደሶና።

19 ሳዓይ አማርሲያ ዋዴ ዬሱሲኔ ኢያ ታማሬቲ ካታማፔ ጋዓ ከዪደሶና።

---

\* 11:9 ሆሳና፣ ማቶ 21:9 ቤዒቲ። 11:9 ማዝ 118:25 11:17 ኢሳ 56:7፤ ኤር 7:11

ባላሴ ሚሊያ ማላሱ  
(ማቶ 21:20-22)

20 እንቲ ዋንቴላ ጋላስ ሄ ኦጊያራ አጳጮ፣ ሄ ባላሴያ ፃጸራ ማሊዳር ቤዒደሶና። 21 ጴጂሮሲ አኬኪዲ፣ «አስታማሪያው፣ ሄኮ፣ ኔኒ ቃንጊዳ ባላሴያ ማላሱ» ያገሰ።

22 ዬሱሲ ዛሪዲ፣ «ፆሳ አማኒቴ። 23 ታኒ ሂንቴው ቱማ ኦዳይስ፤ እኒካ ባ ዋዛናን ሲጶና ጊዳባይ ሃናናይሳ አማኒዲ፣ ሃ ደሪያ፣ «ዴንዳዳ አባን ኩንዳ» ያገረ ኢያው ሃናና። 24 ሄሳ ጊሾ፣ ታኒ ሂንቴው ኦዳይስ፤ ፆሳ ሂንቴ ዋሲያባኔ ኦይቲያባ አይባ ጊዲኮካ ኤኪዳዳ አማኒቴ፣ ሂንቴ ኤካና። 25 ፆሳ ዋሳናው ሂንቴ ኤቂያ ዋዴ ሳሎን ዴዒያ ሂንቴ አዋይ ሂንቴ ናጋራ አቶ ጋና ማላ፣ እኒካ ሂንቴና ናቂዳባይ ዴዒኮ፣ ኢያው አቶ ጊቴ። 26 ሺን አሳ ናጋራ ሂንቴ አቶ ጎና ኢዲኮ፣ ሳሎን ዴዒያ ሂንቴ አዋይካ ሂንቴ ናጋራ ሂንቴው አቶ ጌና» ያገሰ።

ዬሱሲ አይቤ ማታን ኦሊያኮ ኦይሹተስ  
(ማቶ 21:23-27፤ ሉቃ 20:1-8)

27 እንቲ ዛሪዲ ዬሩሳሌም ቤደሶና። ዬሱሲ ፆሳ ኬላን ሃውተሺን፣ ካሂኔ ሃላቃቴ፣ ሂጌ አስታማሪቴኔ ጨማቲ ኢያኮ ዪዲ፣ 28 «ኔኒ ሃይሳ ኦላናው ኔው አይ ማቲ ዴዒ? ዋይኮ ኔው ሃ ማታ ኢሚዳይ ኦኔ?» ያገደሶና።

29 ዬሱሲ ዛሪዲ እንታኮ፣ «ታ ሂንቴና ኢሲባ ኦይቻና፣ ታው ኦዲቴ። ታ ቃሲ ሃይሳ አይ ማታን ኦሊያኮ፣ ሂንቴው ኦዲና። 30 ዮሃኒሳ ዲንቃቴይ ፆሳፌዬ ዋይኮ አሳፕ? ታው ኦዲቴ» ያገሰ።

31 እንቲ ባንታ ጊደን ፓላማ ዶሚዲ፣ «ኦኒ፣ «ፆሳፌ» ጊኮ፣ ኢ ኦኮ፣ «ያቲን፣ ዮሃኒሲ ኦዲዳይሳ አይስ አማኒቤኬት?» ያጋና።

32 «አሳፕ ጊኮ» አሳ ኡባይ ዮሃኒሲ ናቤ ጊዴይሳ ኤሮሶና።» ያኒያ ጊሾ አሳስ ያዪደሶና። 33 ሄሳ ጊሾ፣ እንቲ ዬሱሳኮ፣ «ኦኒ ኤሮኮ» ያገዲ ዛሪደሶና፤

ዬሱሲ፣ «ታኒካ ሃይሳ አይ ማታን ኦሊያኮ፣ ሂንቴው ኦዲኬ» ያገሰ።

# 12

ዋይኔ ቶኪያ ጎሻንቾታ ሌሚሶ  
(ማቶ 21:33-46፤ ሉቃ 20:9-19)

11:23 ማቶ 17:20፤ 1ቆር 13:2

1 ዩሱሲ ኤንታው ለሚሶን ያገዱ ኦዲስ፤ «ኢሲ ኡራይ ዋይኔ ኣታኪልቴ ቶኪዲ፣ ዩሺ ኣሉዲ ዲርሲ ዲሪስ። ቃሲ ሄ ዋይኒያ ጉምዒያ ኦላካ ቦኪስ። ኢያ ናጋናው ኣዲሳ ሻኮ ሻኪስ። ሄሳፌ ጉዩ፣ ኮሌ ኦሊያ ኣሳስ ኢሚዲ፣ ሃራ ቢታ ቢስ። 2 ዋይኔ ኣይፊያ ማዲያ ዋዴይ ጋኪን፣ ባና ጋኪይሳ ኤኪዲ ያና ሜላ፣ ኢሲ ባ ኣይሊያ ኮሌ ኣዋታኮ ኪተስ። 3 ኮሌ ኣዋቲ ኢያ ኣይሊያ ኦይኪዲ ዋዲዲ፣ ሜላ ኩሼ ዩዲደሶና። 4 ናምዓንሎ ሃራ ኣይሌ ኤንታኮ ኪተን፣ ኤንቲ ሄ ኣይሊያስ ሁዒያ ቆዒዲ ካወሺዲ ዩዲደሶና። 5 ዋይኔ ኣታኪልቴያ ጎዳይ ቃሲካ ሃራ ኣይሌ ኪተስ። ሄ ኣይሊያ ዋዲደሶና፣ ቃሲ ሃራ ዳርታ ሄሳዳ ኦሊደሶና፣ ኢሶታ ኢሶታ ዋዲዲ፣ ሃራታ ዋዲደሶና።

6 «ዋይኔ ኣታኪልቴያ ጎዳስ ኪታናው ኡባፌ ወርሴላን ኢ ዳር ደሲያ ባ ናዓ ዓላሊ ኣተስ። ኢ፣ «ኤንቲ ታ ናዓ ቦንቾና ኣጎኮና» ጊዲ፣ ባ ናዓ ኤንታኮ ኪተስ።

7 «ሺን ኮሌ ኣዋቲ ባንታ ጊደን፣ ላታናይሲ ሃይሳ፤ ዩዲቲ ኢያ ዋዲስ፤ ኢያ ሳታይ ኩባ ጊዳና! ያገደሶና። 8 ናዓ ኦይኪዲ ዋዲዲ፣ ኢያ ኣሃ ዋይኔ ኣታኪልቴያ ጊደፌ ጋፃ ኬሲ ሆሊደሶና።

9 «ሂዛ፣ ዋይኔ ኣታኪልቴያ ጎዳይ ዋታኔ? ዩዲ ሄ ኮሌ ኣዋታ ዋዲ ኦንጊዲ፣ ዋይኒያ ኮሌ ኦሊያ ሃራ ኣሳስ ኢሚና።

10-11 ለምቤይሳቲ ቦሪዲ ኢዲዳ ሹቻይ

ጎዳ ዓጵዋ ሚንሊያ፣

ኡባፌ ኣዲያ ሹቹ ጊዲስ።

ሃይሲ ጎዳይ ኦሊዳባ፤

ቃሲ ኩ ኣይፊያሰካ ማላሊሲያባ)

ያገይሳ ጌሻ ማፃፍፔ ናባቢቤኬቲ?» ያገሰ።

12 ካሂኔ ሃላቃቲ፣ ሂጌ ኣሰታማራቲኔ ጨማቲ ዩሱሲ ሄ ለሚሱዋ ባንታ ቦላ ለሚሲዳይሳ ኤሪዳ ጊሾ ኢያ ኦይካናው ኮዩደሶና፣ ሺን ኣሳስ ያዩዲ፣ ኣጊ ቢደሶና።

**ገራ ገርባ**

(ማቶ 22:15-22፤ ሉቃ 20:20-26)

13 ቃሲ ኢያ ኦዳፔ ባላ ዳሚዲ፣ ኢያ ኦይካና ሜላ፣ ፋሪሳዊታፔኔ ሄርዲሳ ባጋታፔ ጉላ ኣሳታ ኢያኮ ኪተደሶና።

14 ኤንቲ ኢያኮ ዩዲ፣ «ኣሰታማሪያው፣ ኔኒ ቱማ ኦዴቴይሳኔ ኣሳፔ ኣሴ ሻኮናይሳ ኩኒ ኤርስ። ኔኒ ኣሴ ዲማያካ፤ ቃሲ ያሳ



ከጊያ ቱማቴላን ታማርሳሳ። ኑኒ ሮሜ ቢታ ካወቀ ቁሳሬስ ገራ ገራይሲ ዋጌዬ ዋጋ ገደኔ? ገራ ገራኔ አጋኔ?» ያገደሰና።

15 ሺን ኤንታ ጩቦቴላ ዬሱሲ ኤሪዲ። «ታና አይስ ፓጩቲ? እኔ ኢሲ ሳንቲሜ ታና ቤሲቲ» ያገሰ። 16 ኤንቲ ኢያው ኤሂደሶና። «ሃ ማላይኔ ሱንሳይ ኦዴይሴ?» ያገደዱ ኤንታ ኦይቺሰ።

ኤንቲ። «ሮሜ ካወቀ ቁሳሬይሳ» ያገደሰና።

17 ዬሱሲ ዛሪዲ። «ያተኮ። ቁሳሬይሳ ቁሳሬሰ። ያሳይሳ ያሳሰ አሚቴ» ያገሰን ኤንቲ ኢያባ ማላሌቲደሶና።

**ሃይቆፔ ዴንደባ**

(ማቶ 22:23-33፤ ሉቃ 20:27-40)

18 ሃይቂዳ አሲ ዴንዴና ጊያ ሳዲቃዊታፔ ኢሲ ኢሲ አሳቲ ዬሱሳኮ ዪዲ። ሃይሳዳ ያገደዱ። ኢያ ኦይቺደሶና።

19 «አስታማሪያው። ሙሴይ ኑስ ሂጊያ ፃፊሼ። <ማቶ ኤኪዳ አሲ ናባ ዬሎና ሃይቂኮ። ሄ ሃይቂዳይሳ አሻይ ኢያ ማቺው ኤኪዲ። ባ አሻሰ ናባ ዬላናው ቤሴስ) ያጌይሳ ፃፊስ። 20 ቤኒ ዋዴ ላፑን አሻቲ ዴዔይሳታፔ ባይራይ ማቶ ኤኪዲ። ናባ ዬሎና ሃይቂስ። 21 ናምባንሶይ ኢዮ ኤኪስ። አካ ናባ ዬሎና ሃይቂስ። ሄቫንሶይካ ሄሳዳ ሃኒስ። 22 ላፑናቲካ ሄሳላ ኢዮ ኤኪዲ። ናባ ዬሎና ሃይቂደሶና። ኡባፌ ጉዬ። ቃሲ ሄ ማጫሲያ ሃይቃሱ። 23 ያቲን። ላፑናቲ ኢዮ ኤኪዳ ጊሾ ሃይቂዳ አሳይ ሃይቆፔ ዴንዲያ ጋላስ። ኢያ ኤንታፌ አዉሳሰ ማቶ ገደኔ?» ያገደሰና።

24 ዬሱሲ ዛሪዲ። «ሂንቲ ባሌይ። ጌሻ ማፃፋታ ዋይኮ ያሳ ዋልቃ ኤሮና ጊሾሳ! 25 ሃይቂዳ አሳይ ሃይቆፔ ዴንዲያ ጋላስ። ሳሎን ዴዒያ ኪታንቾታ ሜላ ገዳናፔ አቲን አዴ አሳይ ኤኮኮና፤ ማጫ አሳይ ጌሌኮና። 26 ሺን ሃይቂዳይሳታ ዴንዲያባ ገዲኮ። ሙሴ ማፃፋን ፃፊቲዳ ፀጌቲያ ቡሪያባ ኦዲያ ቤሳን። ያሳይ ሙሴኮ። <ታኒ። አብራሃሜ ያሳ። ዪሳቃ ያሳ። ያይቆባ ያሳ) ገዳይሳ ናባቢቤኬቲ? 27 ሄሳ ጊሾ። ኢ። ፓፃ ዴዔይሳታ ያሳፌ አቲን ሃይቂዳይሳታ ያሴ ገደና። ሂንቲ ዳሮ ባሊዴታ» ያገሰ።

**ኡባፌ አዲያ ኪታ**

(ማቶ 22:34-40፤ ሉቃ 10:25-28)

28 ሂጌ አስታማሪታፔ ኢሶይ ኤንቲ ፓላሜይሳ ሺቂዲ ሲዒስ። ቃሲ ዬሱሲ ኤንታው ሎይሴ ዛሪዳይሳ ሲዒዲ። «ኪታ ኡባፌ አዲያ ኪታይ አዉሴ?» ያገደዱ ዬሱሳ ኦይቺሰ።

29 ዩሱሲ ዛሪዲ፣ ኢያ ሃይሳዳ ያገለገለ፡ «ኪታ ኡባፌ አዲያ ኪታ ሲባቴ፤ ኢሰሪዔሌ አሳው፣ ጎዳይ ኑ ያሳይ ኢሲ ጎዳ።

30 ኔ ጎዳ ኔ ያሳ ኔ ኩሜላ ዋዛና፤ ኔ ኩሜላ ሼምፑዋፌ፣ ኔ ኩሜላ ቆፋ፤ ኔ ኩሜላ ዋልቃፌ ደሳ) ያገለገለ። 31 ቃሲ ኪታ ኡባፌ አዲያ ናምዓንላ ኪታይ ሃይሳ፤ (አሴ ኡባ ኔ ሁዒያዳ ደሳ) ያገለገለ፤ ሃይሳታ፤ አዲያ ሃራ ከቲ ባዋ» ያገለገለ።

32 ሂጌ አስታማሪይ ዩሱሳኮ፡ «አስታማሪያው፣ ቱማ ጋዳሳ፤ ኔ ከ (ያሳይ ኢሲ ያሳ ዓላላ። ኢያ፤ አቲን ሃሪ ባዋ) ገዳይሲ ቱማ። 33 ያሳ ኩሜላ ዋዛና፤ ኩሜላ ቆፋ፤ ኩሜላ ዋልቃፌ ደሴይሲ፣ ቃሲ አሴ ኡባ ባ ሁዒያዳ ደሴይሲ፣ ፀጊያ ያርሹዋፌ ነራ ያርሹ ኡባፌ አዲስ» ያገለገለ።

34 ዩሱሲ ሂጌ አስታማሪያ ዛርይ አዲያ ኤራንቸ አሳ ዛር ገዲዳይሳ ቤዒዲ፡ «ኔ ከ ያሳ ካዋቱላፌ ሃካባካ» ያገለገለ፤ ሄሳፌ ጉዩ፡ ዩሱሳ ሃራባ ኦይቻናው ኦኒካ ሚኒቤና።

ኪሪሰቶሲ ኦዴ ናዔ  
(ማቶ 22:41-46፤ ሉቃ 20:41-46)

35 ዩሱሲ ያሳ ኬላን ታማርሲሼ፡ ሃይሳዳ ያገለገለ፡ «ሂጌ አስታማሪቲ ኪሪሰቶሳ ዋይገዲ ዳዊቱ ናዔ ጎና? 36 ዳዊቱይ ጌሻ አያናን ኩሚዲ፡

ሳዳይ፡ ታ ጎዳ፡ «ታኒ ኔ ሞርኬታ ኔ ቶሆይ ዩዲያሶ ኦላና ጋካናው፡

ሃይሳን ታ፤ ኡሻቻ ባጋራ ኡታ» ገሰ) ያገለገለ። 37 ዳዊቱይ ባ ሁዒን ኪሪሰቶሳ፡ (ሳዳ) ገዲ ያገለገለ፡ «ከ ኪሪሰቶሲ ዋኒዲ፡ ዳዊቱ ናዔ ገዲ» ያገለገለ።

ዳር አሳይ ዩሱሲ ገይሳ ኡፋይሳን ሲዒደሶና።

ዩሱሲ ሂጌ አስታማሪታኔ ፋሪሳዊታ ቦሪሰ  
(ማቶ 23:1-36፤ ሉቃ 20:45-47)

38 ዩሱሲ ታማርሲሼ፡ ሃይሳዳ ያገለገለ፡ «ሂጌ አስታማሪታ፤ ናጌቲ፤ ኤንቲ አዲሳ ማዖ ማዒዲ ዩዩይሳኔ ጊያንካ አሳይ ኤንታ ቦንቸዲ ሳርሌይሳ ደሶሶና። 39 ኤንቲ አይሁዴ ዋሳ ኬላታን ዳር ሎዖ ኦይዴ ደሶሶና፤ ቃሲ አሲ ባንታና ሞኪያ ቤሳን ቦንቸ ቤሲ ደሶሶና። 40 ኤንቲ አምዔታ ኬላ ቦንቄዲ፡ ባንታው ሎዖ ዳናናው ዋሳ አዲሶሶና፤ ኤንቲ ኡባፌ አዲያ ፒርዳ ኤካና» ያገለገለ።

አምቤ ሙፃታ  
(ሉቃ 21:1-4)

41 ዩሱሲ ያሳ ኬላን ሙፃታ ዩጊያ ሳዲኒያ ማታን ኡቲዲ፣ አሳይ ባ ሚሺያ ሄ ሳዲኒያን ዩጌይሳ ቤዒሲ፤ ዳሮ ዳሬ አሳይ ዳሮ ሚሺያ ሄ ሳዲኒያን ዩሳሶና። 42 ኢሲ ማንቆ አምቤ ያዳ፣ ናምዑ ባካናታ ሄ ሳዲኒያን ዩጋሱ። 43 ዩሱሲ ባ ታማሬታ ጃጊዲ፣ «ታኒ ሂንቴው ቱማ ኦዳይሰ፤ ሙፃታ ሳዲኒያን ዩጊዳ አሳ ኡባሬ ሃ ማንቆ አምቤ ዳርሳዳ ዩጋሱ። 44 አይሰ ጊኮ፣ ሃራቲ ኡባይ ባንታው ፓላሂዳ ሚሺያፔ ዩጊዳሶና። ሺን ኢያ ባ ፓጩያፌ፣ ባው ዳዒያ አቁዋ ኩሜሊ ኢማሱ» ያገሰ።

# 13

ዩሱሲ ያሳ ኬላይ ላሌታናይሳ ኮይርቲዲ ኦዲሰ  
(ማቶ 24:1-2፤ ሉቃ 21:5-6)

1 ዩሱሲ ያሳ ኬላፌ ኬዩሺን፣ ኢያ ታማሬታፔ ኢሶይ፣ «አስታማሪያው፣ ሃ ሎፖ ሹቻኔ ሃ ሎፖ ሹቻ ኬላ ቤዒይ!» ያገሰ።  
2 ዩሱሲ ዛሪዲ፣ «ሃ ጊታ ሹቻ ኬላ ቤዒይ? ሃ ኬላይ ሹቹ ሹቻ ቦላ ጊምቤቲዳ ማላ ላሌቶና ኣቴና፤ ኢሲ ሹቹካ ኣቶና ኡባይ ላሌታና» ያገሰ።

ጎዳይ ያናፔ ኮይርቲዲ ጋካና ጎዳኔ ዋያ  
(ማቶ 24:3-14፤ ሉቃ 21:7-19)

3 ዩሱሲ ያሳ ኬላፌ ሂኒ ባጋራ ሻማሆ ዳሪያ ቦላ ኡቲዳሺን፣ ጴዳርሲ፣ ያይቆቢ፣ ዮሃኒሲኔ ኢንዲሪያሲ ባንታርካ ኢያኮ ዩዲ፣ 4 «ሃይሲ አዉዳ ሃናኔኮ፣ ኑሰ ኦዳ፤ ሃ ኡባይ ፖሌታና ዋዲያ ኤሪሲያ ማላታይ አይቤ?» ያገዲ ኦይቹዳሶና።  
5 ዩሱሲ ቃሲ ኤንታው ሃይሳዳ ያገዲ ኦዲሰ፣ «ሂንቴና ኦኒካ ባሌላና ማላ ናጌቲቴ። 6 ዳሮ አሳቲ ታ ሱንላን፣ (ታኒ ኪሪሰቶሳ) ያገዲ ታማርሲሼ ዩዲ፣ ዳሮ አሳ ባሌላና። 7 ማታን ዳዒያ ኦላኔ ሃሆን ዳዒያ ኦላ ዋሪ ሂንቴ ሲዒያ ዋዳ ሂርጎፊቴ። ሄሳ ማላባይ ሃናናው ቤሴሰ፣ ሺን ዉርሴላይ ቡርና። 8 ኢሲ ቢታ አሳይ ሃራ ቢታ አሳራ ኦሌታና፤ ቃሲ ኢሲ ካዋቴላይ ሃራ ካዋቴላታራ ኦሌታና፤ ቢታ ቃይሰ ኡባ ቤሳን ሃናና፤ ኮሻይ ዳና፣ ሺን ሄሲ ኡባይ ዩሎ ኢቆሳሰ ዘኬ ማላ።

9 «ሺን ሂንቴ፣ ሂንቴ ሁዔን ናጌቲቴ። አይሰ ጊኮ፣ አሲ ሂንቴና ኦይኪዲ፣ ፐርዳ ኬላሰ አሊ ኢማና፤ ቃሲ አይሁዳ ዋሳ ኬላታንካ ሂንቴና ሊሶን ጋራፋና፤ ዳሪያ ሃራይሳታ ሲንላኒኔ ካዋታ ሲንላን

ታ ጊሾ ሂንቴ ማርካታናው ኤቃና። 10 ወርሴላይ ጋካናፔ ሲንሌ ዋንጌላይ ኮይሮ ዳሬ ኡባሰ ኦይታናው ቤሴሰ። 11 ኤንቴ ሂንቴና ፐርዳ ኬሌ ኤሂያ ዋዴኔ ኣሉ ኢሚያ ዋዴ ዋይጊዲ ኦዳኔኮ ኮይሮ ሂርጎፊቴ፤ ሄ ሳቲያን ያሳይ ሂንቴው ኢሚያባ ኦዲቴ። ሂንቴናን ጌሻ ኣያናይ ኦይቴሲፔ ኣቲን ሂንቴና ጊዴኮታ።

12 «ኢሻይ ባ ኢሻ፣ ኣዋይ ባ ናዓ ዋዲሳና። ናይቲ ባንታና ዩሊዳይሳታ ቦላ ዴንዲዲ፣ ኤንታ ዋዲሳና። 13 ኣሳይ ኡባይ ሂንቴና ታ ሱንላ ጊሾ ኢፃና፣ ሺን ወርሴሌ ጋካናው ሚኒዳይ ኣታና።

**ዩሩሳሌም ጋካና ኢታ ማቴዎ**  
(ማቶ 24:15-28፤ ሉቃ 21:20-24)

14 «ሺን ባሻ ቱናቴላይ ኤቃናው ቤሶና ቤሳን ኤቁዳሺን ሂንቴ ቤዓና።» (ኣኬኪሶ፡ ሄሲ ዋይ ጉሴኮ ናባቤይሲ ኣኬኮ!) «ዪሁዳ ቢታን ሄ ዋዴ ዴዔይሳቲ ዴሪያኮ ባቃቶ። 15 ኬላ ሁዔን ዴዔያ ኡራይካ ኢሲባ ኤካናው ዲጌ ዋዲዲ፣ ባ ሶ ጌሎፖ። 16 ጋዴን ዴዔይሲ ባ ማዑዋ ኤካናው ጉዬ ሲሞፎ። 17 ሄ ዋዴ ቃንሳቲዳ ማጫሳታሲኔ ቋንሌያ ማጫሳታሰ ዳር ኡንዓ ጊዳና። 18 ሺን ሃይሲ ኡባይ ሃኒያ ዋዴይ ባልጎ ጊዳና ማላ፣ ያሳ ዋሲቴ። 19 ኣይሰ ጊኮ፣ ያሳይ ኣላሚያ ሜዲዳ ዋዲያፔ ደሚዲ፣ ሃዒ ጋካናው ሃኒቦና ሜቶይኔ ሲንሳፊካ ሃናና ሜቶይ ኣሳ ቦላ ሄ ዋዴ ሃናና። 20 ጎዳይ ሄ ጋላሳታ ታይቡዋ ጉሉናኮ፣ ኣሴ ጊዲዳይ ኦኒካ ኣቴና። ሺን ኢ ባ ደሪዳ ኣሳ ጊሾ ሄ ጋላሳታ ታይቡዋ ጉሉሰ።

21 «ሄ ዋዴ ኦኒካ ሂንቴና፣ ሃኮ፣ ኪሪሰቶሲ ሃይሳን ዴዔሰ ዋይኮ ኪሪሰቶሲ ሃኒን ዴዔሰ) ያጊኮ፣ ሄሳ ኣሚኖፒቴ። 22 ዋርዳንቾ ኪሪሰቶሳቲኔ ዋርዶ ናቤቲ ዴንዲዲ ባንታው ዳንዳዔቲኮ፣ ሃሪ ኣቶሺን ያሳይ ደሪዳይሳታካ ባሌላናው ማላታታኔ ማላሊሲያባታ ቤሳና። 23 ሺን ሂንቴ ናጌቲቴ፤ ታኒ ሂንቴው ኡባባ ካሴታዳ ኦዳሰ።

**ኪሪሰቶሳ ናምዓንሉ ዩሳ**  
(ማቶ 24:29-31፤ ሉቃ 21:25-28)

24 «ሺን ሄ ዋዴ ሄ ዋያፔ ጉዬ፣  
ኣዋይ ቋማና፤  
ኣጌናይ ፖዑዋ ኣጋና፤

---

13:9 ማቶ 10:17-20፤ ሉቃ 12:11-12    13:13 ማቶ 10:22    13:14 ዛሬ 9:27፤ 11:31፤ 12:11    13:15 ሉቃ 17:31    13:19 ዛሬ 12:1፤ ዮ.ቆ 7:14    13:24 ኢሳ 13:10፤ ኤር 2:10

25 ያሊንቶቲ ሳሎፔ ኩንዳና፤  
 ቃሲ ሳሎን ዳዒያ ዋልቃቲካ ቃፃና።  
 26 ሄ ዋዴ ኣሳ ናዓይ፡ ጌታ ዋልቃራኔ ቦንቹዋራ ሻራ ጌዶራ ዪሺን ኤንቲ ቤዓና። 27 ሄ ዋዴ ታኒ ኪታንቸታ ሳዓ ኦይዱ ባጋ ኪታና፤ ሳዓ ጋፃፔ ሳሎዋ ጋፃ ጋካናው፡ ያሳይ ዶሪዳ ኣሳ ሺሻና።

ዋዴይ ጋኪዳይሳ ኤሪሲያ ባላሴ ሚሊው  
 (ማቶ 24:32-35፤ ሉቃ 21:29-33)

28 «ለሚሱዋ ባላሴ ሚላፌ ኣኩኪቲ፤ ባላሲያ ኣጨያ ዋዴኔ ኢ ሃይላይ ጨለዒያ ዋዴ ቶርቹይ ማታቲዳይሳ ሂንቲ ኤሬታ።  
 29 ሄሳዳካ፡ ሂንቲ ሄ ኡባባይ ሃኔይሳ ቤዒያ ዋዴ ኢ ማቲዲ ፔንጌ ጋኪዳይሳ ኤሪቲ። 30 ታኒ ሂንቲው ቱማ ኦዳይሰ፤ ሃ ኡባባይ ሃናና ጋካናው ሃይሳን ዳዒያ ኣሳ ኡባይ ሃይቄና። 31 ሳሎይኔ ሳዓይ ኣቆና፡ ሺን ታ ቃላይ ኡባራካ ኣጴና።

ጎዳይ ያና ጋላሳኔ ሳቲያ ኦኒካ ኤሬና  
 (ማቶ 24:36-44)

32 «ሺን ሄ ጋላሳኔ ሄ ሳቲያ ኣዋ ፃላላፔ ኣቲን ሃሪ ኣቶሺን ሳሎን ዳዒያ ኪታንቸታ ጌዲን ዋይኮ ናዓ ጌዲን ኦኒካ ኤሬይ ባዋ። 33 ሄ ዋዴይ ኣዉዴ ጌዳኔኮ፡ ሂንቲ ኤርና ጊሾ ናጌቲቲኔ ሚኒቲ። 34 ታ ዩሳይ ባ ኬላ ኣጊዲ፡ ኦጌ ቢያ ኡራ ሜላ። ኡራይ ባ ኣይሌታ ሁዔን ሁዔን ኦሱዋ ኢሚዲ ኤንታ ባ ኦሱዋሰ ኣዋ ኦሊሰ፤ ቃሲ ናጌይሲካ ሚንሊዲ ናጋና ሜላ ከቲሰ።  
 35 «ሃሳ ጊሾ፡ ሚኒቲ። ኣይሰ ጊኮ፡ ኬላዋይ ኦማርሲ ጌዲን ዋይኮ ጌዲ ቢላሃ ጌዲን ዋይኮ ኩቶ ዋሶ ጌዲን ዋይኮ ዋንታ ጉራ ጌዲን ኣዉዴ ያኔኮ፡ ሂንቲ ኤሬኬታ። 36 ሂንቲ ኣኬኮና ኢ ዪዲ ሂንቲና ቋሰኪዲ ዳዒሺን ዳዋና ሜላ ሚኒቲ። 37 ታኒ ሂንቲው ኦዳይሳ ኣሳ ኡባሰ ኦዳይሰ፤ ሚኒቲ» ያገሰ።

# 14

ኪሪሰቶሳ ቦላ ማቄቲዶሶና  
 (ማቶ 26:1-5፤ ሉቃ 22:1-2፤ ዮሃ 11:45-53)

1 ፓሲካ ባሌ ቦንቹያ ጋላሳይኔ ኡይላ ባሌ ቦንቹያ ጋላሳይ ጋካናው ናዋዑ ጋላሲ ኣቲሰ። ካሂኔ ሃላቃቲኔ ሂጌ ኣስታማሬቲ

---

13:25 ኢሳ 34:4፤ ዮ.ቆ 6:13፤ ኤር 2:10      13:26 ዛሬ 7:13፤ ዮ.ቆ 1:7  
 13:32 ማቶ 24:36      13:34 ሉቃ 12:36

አሲ ኤሮና ዩሱሳ አይኪዲ ዋጂያ ኦጌ ኮዮሶና። 2 «አሳይ ኦሺ ኬሶና ማላ ፓሲካ ቦንቺያ ጋላሳን ሄሳ ኦሎኮ» ያገደሶና።

ዩሱሳ ሺቱዋ ቲዩዳ ማጫሲው  
(ማቶ 26:6-13፤ ዮሃ 12:1-8)

3 ዩሱሲ ቢታኒያ ካታማን ባሮ ሃርጋንቸዋ ሲሞና ሶን ጊቢራ ቦላ ኡቲዳሺን፣ ኢሲ ማጫሲያ አልባሰዊሮሴ ጊያ ሹቻፌ ኦሴቲዳ ጰልቃፀ ኩሜላ ናርዶሴ ጊያ ዳሮ አልዎ ሺቶ ኤካዳ ያሱ። ሄ ጰልቃፀያ ሜንፋዳ ሺቱዋ ዩሱሳ ሁዒያን ቲጋሱ። 4 ሄ ቤሳን ዴዒያ አሳፔ ኢሶይ ኢሶይ ሃንቄቲዲ፣ «ሃ ሺቶይ ማላ ጮ ኢቲይ አይቢሴ? 5 ሃ ሺቱዋ ሃቹ ፄቱ ዲናሬን \* ባይዚዲ፣ ሚሺያ ማንቆታሰ አማናው ዳንዳዔቴሰ» ያገዲ ባንታ ጊደን ኦዴቲዶሶና። ያቲዲ፣ ሄ ማጫሲው ዳሮ ቦሪዶሶና።

6 ሺን ዩሱሲ «ሃ ማጫሲው አይኮካ ጎፒቲ፤ ኢዮ አይሰ ዋይሴቲ? ኢያ ታው ሎዖባ አላሱ። 7 ማንቆቲ ኡባ ዎዴ ሂንቴራ ዴዖሶና። ሂንቴ ኮዩዳ ዎዴ አዉዴካ ሂንቴ ኤንታ ማዳናው ዳንዳዔታ፣ ሺን ታኒ ኡባ ዎዴ ሂንቴራ ዴዒከ። 8 ኢያ ባ ዳንዳዒዳይሳ አላሱ፤ ቃሲ ታና ሞጎሰ ገገሳናው ካሴታዳ ሺቶ ቲያሱ። 9 ታኒ ሂንቴው ቱማ ኦዳይሰ፤ ሳሳ ኡባን ዎንጌላ ኦዲያሶን አዉንካ፣ አሳይ ኢዮ አኬካና ማላ ሃ ኢያ ኦሴዳይሲ ኦዴታና» ያገሰ።

ዩሁዲ ዩሱሳ አሴዲ አማናው ዞሬቲሰ  
(ማቶ 26:14-16፤ ሉቃ 22:3-6)

10 ታማኔ ናሞዑ ታማሬታፔ ኢሶይ አሰቆርታ ዩሁዲ ጌቲቲይሲ ዩሱሳ ካሂኔ ሃላቃታሰ አሴ አማናው ኤንታኮ ቢሰ። 11 ኤንቲ ሄሳ ሲዒዳ ዎዴ ኡፋይቲዲ፣ «ኦኒ ኔው ሚሹ አማና» ያገደሶና፤ ዩሁዲ ዩሱሳ አሴ አማናው ኢንጄ ዎዴ ኮዩሰ።

ዩሱሲ ባ ታማሬታራ ፓሲካ ሚሰ  
(ማቶ 26:17-25፤ ሉቃ 22:7-14፣ 21-23፤ ዮሃ 13:21-30)

12 ኡይላ ባሌይ ቦንቺቲያ ኮይሮ ጋላሰ፣ ፓሲካ ካላ ማናው ማራዜ ሹኪያ ዎዴ ዩሱሳ ታማሬቲ ኢያኮ፣ «ፓሲካ ቦንቺያ ጋላሰ ኔኒ ማና ካላ ኦኒ አው ቢዲ ገገሲና?» ገዲ ኦይቺዶሶና።

---

14:1 ኬሳ 12:1    14:3 ሉቃ 7:37    \* 14:5 ሃቹ ፄቱ ዲናሬ፡ ኢሲ አሳሰ ላይላን ጨጌቲያ ሎዖ ዳሞዜፔ ቦላ ገዲያ ሚሹ።    14:7 ዛሬ 15:11

13 ዩሱሲ ባ ታማሪታፔ ናምዓታ ሃይሳዳ ያጊዲ ከቲስ፡ «ካታማ ቢቲ፤ ሂንቲ ቢሺን፤ ኦቶራ ሃሌ ቶኪዳ ኢሲ ኡራይ ሂንቲራ ጋሂታና፤ ኢያ ካሊቲ። 14 ኢ ቢዲ ጌሊያ ከላዋ፡ «አስታማሪይ ኔኮ፡ «ታኒ ታ ታማሪታራ ፓሲካ ማናው ኢማላ ከፊሌይ አዉኔ?» ያጌሰ) ያጊቲ። 15 ከላዋይ ሂንቲና ፖቁያ ቦላ ዴዒያ ጊጊ ኡተዳ ዳልጋ ከፊሌ ቤሳና፤ ሄሳን ጊጊሲቲ» ያጊሰ።

16 ሄ ናምዑ ታማሪቲ ከዩዲ፡ ካታማ ቢደሶና፤ ዩሱሲ ኤንታው ኦዲዳይሳዳ ዴሚዲ፡ ፓሲካ ካላ ጊጊሲደሶና።

17 ሳዒይ ኦማርሲያ ዋዴ ዩሱሲ ታማኔ ናምዑ ታማሪታራ ያ ቢሰ። 18 ኤንቲ ኡቲዲ ካሊ ሚሺን፡ ዩሱሲ ኤንታኮ፡ «ታኒ ሂንቲው ቱማ ኦዲይሰ፤ ሂንቲፌ ኢሶይ ታራ ሜይሲ፡ ታና አሊ አማና» ያጊሰ።

19 ኢያ ታማሪቲ ዳጋሚዲ፡ ባንታ ሁዔን ሁዔን፡ «ቱማ ታኔሻ?» ያጊዲ ኢያ ኦይቺደሶና።

20 ዩሱሲ ዛሪዲ፡ «ሄ ኡራይ ሂንቲ ታማኔ ናምዓታፔ ኢሱዋ፤ ኢ ታራ ኢሲፌ ቱሻናው ባ ኡይላ ሻቲያን ዩዴይሳ። 21 አሳ ናዓይ፡ ጌሻ ማፃፋይ ሃይቃና ጊዳይሳዳ ሃይቃና፡ ሺን አሳ ናዓ፡ አሊ አሚያ ኡራ አዬ። ሄ ኡራይ ዩሌቶና አቲዳኮ ኢያው ሎፖሺን» ያጊሰ።

ኅዳ ካሁዋ

(ማቶ 26:26-30፤ ሉቃ 22:14-20፤ 1ቆሮ 11:23-25)

22 ኤንቲ ሚሺን፡ ዩሱሲ ኡይላ ኤኪዲ፡ ያሳ ጋላቲሰ፤ ሄ ኡይላ ሚንሊዲ፡ ባ ታማሪታሰ አሚሼ፡ «ሄዒቲ፡ ሃይሲ ታ አሹዋ» ያጊሰ።

23 ፀዓ ኤኪዲ፡ ያሳ ጋላቲዲ፡ ኤንታው አሚን ኡባይካ ሄ ፀዓፔ ኡዩደሶና። 24 ዩሱሲ፡ «ሃይሲ ኦራላ ጫቁዋን ዳሮ አሳ ጊሾ ጉኪያ ታ ሱላ። 25 ታኒ ሂንቲው ቱማ ኦዲይሰ፤ ታኒ ያሳ ካዋቲላን ኦራላ ዋይኒያ ኡያና ጋላሳይ ጋካናው ዛራዳ ሃ ዋይኒያፔ ኡዩኬ» ያጊሰ።

26 ማዘሙራ ዩዲዳፔ ጉዬ ሻማሆ ዴሪያ ቦላ ቢደሶና።

ጳደርሲ ካዳናይሳ ዩሱሲ ኮይርቲዲ ኦዲሰ  
(ማቶ 26:31-35፤ ሉቃ 22:31-34፤ ዮሃ 13:36-38)

27 ዩሱሲ ኤንታኮ፡ «ሂንቲ ኡባይ ታና ዩጊ አጊዲ ባቃታና፤ ጌሻ ማፃፋይ፡

የሳይ ደርሳ ሄሜይሳ ዋዳና፤  
ደርሳቲ ኡባይ ላሌታና

ያጌሰ። 28 ሺን ታኒ ሃይቆፔ ዴንዲዳፔ ጉዬ ሂንቴፌ ካሴታዳ ጋሊላ ባና» ያጌሰ።

29 ጳጳሮሲ ዛሪዲ፣ «ኤንቲ ኡባይ ኔና ዬጊ አጊዲ ባቃቲኮካ፣ ታ ኔና አጊኬ» ያጌሰ።

30 ዩሱሲ ጳጳሮሳኮ፣ «ታኒ ኔው ቱማ ኦዳይሰ፤ ሃቺ ቃማ ኩቶይ ናምዑ ቶሆ ዋሳናፔ ሲንጼ ኔኒ ታና ሄቹ ቶሆ ካዳና» ያጌሰ።

31 ሺን ጳጳሮሲ ካሴይሳፌ ሚንጼዲ፣ «ታኒ ሃሪ አቶሺን፣ ኔራ ኢሲፌ ሃይቂያኮካ፣ ኔና ካዲኬ» ያጌሰ። ቃሲ ሃራቲ ኡባቲካ ሃሳዳ ጊደሶና።

**ዩሱሲ ጌቴሴማኔን ዋሲሰ**  
(ማቶ 26:36-46፤ ሉቃ 22:39-46)

32 ጌቴሴማኔ ጊያ ቤሳ ቢደሶና፤ ዩሱሲ ባ ታማሬታኮ፣ «ታኒ ያሳ ዋሳዳ ሲማና ጋካናው ሂንቴ ሃይሳን ኡቲሺቴ» ያጌሰ።

33 ዩሱሲ ጳጳሮሳ፣ ያይቆባኔ ዮሃንሳ ባራ ኤኪዲ ቢሰ፤ ዳር ዋዩቲሲኔ ኡንዔቲሰ። 34 ቃሲ ኤንታኮ፣ «ታኒ ሃይቃና ጋካናው አዛናሰ፣ ሃይሳን ጋምዒሺቴ፤ ጳሰኮፊቴ» ያጌሰ።

35 ጉጼ ሲንጼ ሸቂዲ፣ ሳዓን ጉፋኒዲ፣ ዳንዳዔቲያባ ጊዲኮ፣ ሄ ዋያ ሳቴይ ባፔ አዳና ሚላ፣ ያሳ ዋሲሰ። 36 ቃሲ፣ «አባ፣ ታ አዋው፣ ኡባባይ ኔው ዳንዳዔቲሰ፣ ሃ ዋዩ ፀዓ ታፔ ዲጋ። ሺን ኔ ሺኔይ ሃኖፔ አቲን ታ ሺኔይ ሃኖፖ» ያጌሰ።

37 ዩሱሲ ባ ታማሬታኮ ሲሚ ዪዲ፣ ኤንቲ ጳሰኪዳሺን ዴሚዲ፣ ጳጳሮሳኮ፣ «ሲሞና፣ ጳሰካዲ? ኔኒ ኢሲ ሳቴካ ባርካዳ ናጋናው ዳንዳዓቢኪ? 38 ፓጩን ሂንቴ ጌሎና ሚላ ባርኪዲ ናጊቴኔ ያሳ ዋሲቴ። ሂንቴው ሎዖ አሞይ ዴዔሰ፣ ሺን ሂንቴ ዳቡራንቾ አሲ» ያጌሰ።

39 ቃሲካ ቢዲ ካሴይሳዳካ ያሳ ዋሲሰ። 40 ባ ታማሬታኮ ጉዬ ሲሚዲ ያ ዋዩ ጳሰኪዳሺን ዴሚሰ። ኤንታ አይፊያ ጳሰኮይ ጎዚ ዋሉዳ ጊሾ ኢያኮ አይ ኦዴቲያኮካ ኤሮኮና።

41 ሄቫንሶ ኤንታኮ ዪዲ፣ «ሃዒ ጋካናዉካ ጳሰኬቴኔ ሸምፔቲ? ሂዛ፣ ጊዳና፤ ሳቴይ ጋኪሰ፤ ቤዒቴ! አሳ ናዓይ፣ ናጋራንቾ አሳታሰ አጲ ኢሚታና ዋዴይ ጋኪሰ። 42 ዴንዲዲ ዩጲቴ፤ ቤዒቴ፣ ታና አጼ ኢማናይሲ ጋኪሰ» ያጌሰ።



ዩሱሲ ባ ሞርኬታ ኩሼን ኦይኬተሰ  
(ማቶ 26:47-56፤ ሉቃ 22:47-53፤ ዮሃ 18:3-12)

43 ዩሱሲ ሄሳ ቡሮ ኦዲሺን፣ ታማኔ ናሞዑ ኢያ ታማሬታፔ ኢሶይ፣ ዩሱዲ፣ ኤሌሲዲ ጋኪ ዋጂሰ። ቃሲ ካሂኔ ሃላቃቲ፣ ሂጌ አሰታማሬቲኔ ጨማቲ ከቲን፣ ማሼኔ ፃሞዓ ኦይኪዳ ዳሮ አሳይ ኢያራ ኢሲፌ ዩደሶና። 44 ዩሱሳ አሌ ኢማናይሲ ሄ ዳሮ አሳሰ፣ «ታኒ ዩሬይ ኢያ፤ ኢያ ኦይኪዲ፣ ሎይሌ ናጊዲ፣ ኤኪ ኤፊቴ» ያጊዲ ማላ ኦዲ ዋሲሰ።

45 ዩሱዲ ጋኪ ዋጂዳ ማላ ዩሱሳኮ ሸቂዲ፣ «አሰታማሬያው» ያጊዲ ዩሱሳ ዩሪ ኤኪሰ። 46 ሄ ዳሮ አሳይ ዩሱሳ ኦይኪደሶና። 47 ሺን ማታን ኤቁዳይሳታፔ ኢሶይ ባ ማሻ ሾዲዲ ካሂኔ ሃላቃ ኦይሊያ ሾጪዲ፣ ኢያ ሃይላ ቃንፂዲ ሆሊሰ።

48 ዩሱሲ ዛሪዲ፣ ሄ ሸቂዳ ዳሮ አሳኮ፣ «ታና ፓንጋ ኬሲዲ፣ ፓንጋ ኦይኬይሳዳ ኦይካናው ማሼኔ ፃሞዓ ኦይኪዲ ዩዳቲ?

49 ታኒ ያሳ ኬላን ታማርሳሼ፣ ጋላሰ ጋላሰ ሂንቴራ ዴዒያ ዎዴ ታና ኦይኪቤኬታ፣ ሺን ጌሻ ማፃፋይ ጊዳይሲ ፖሌታናው ቤሴሰ» ያጊሰ።

50 ኢያ ታማሬቲ ኡባይ ኢያ ዩጊ አጊዲ ባቃቲደሶና።

51 ላፃና ፃላላ ማዒዳ ኢሲ ናቴላ ኡራይ ዩሱሳ ካሌይሳ አሳይ ኦይኪሰ። 52 ሺን ሄ ኡራይ ላፃና ዩጊ አጊዲ፣ ፂሬ ካሎ ባቃቲሰ።

ዩሱሳ ፒርዳ ሻንጎ ሲንጼ ኤፊደሶና  
(ማቶ 26:57-68፤ ሉቃ 22:54-55፣ 63-71፤ ዮሃ 18:13-14፣ 19-24)

53 አሳይ ዩሱሳ ካሂኔ ሃላቃ ሶ ኤፊደሶና። ያን ካሂኔ ሃላቃቲ፣ ጨማቲኔ ሂጌ አሰታማሬቲ ሸቂዲ ዴዎሶና። 54 ጴጌርሲ ካሂኔ ሃላቃ ዛባ ጋካናው ሃሆን ኢያ ካሊ ቢዲ ያን ናጌይሳታራ ኡቲዲ ታማ ካዩሰ።

55 ካሂኔ ሃላቃቲኔ ሸቂዳ አሳ ኡባይ ዩሱሳ ዎጃናው ኢያ ቦላ ማርካ ኮዩደሶና፣ ሺን አይኮካ ዴሚቦኮና። 56 ዳሮ አሳቲ ኢያ ቦላ ዎርዶ ማርካቲደሶና፣ ሺን ኤንታ ማርካቴላይ ኢሲና ጊዴና።

57-58 ኢሲ ኢሲ አሳቲ ዴንዲ ኤቁዲ ዩሱሳ ቦላ፣ «ኢ፣ «ታኒ አሲ ኬፂዳ ሃ ያሳ ኬላ ላላዳ፣ አሳ ኩሼን ኬፃቲቦና ሃራ ያሳ ኬላ ሄቩ ጋላሳ ጊደን ኬፃና» ጊሺን ኮኒ ሲዒዳ» ያጊዲ ዎርዶ ማርካቲደሶና። 59 ጊደሺን፣ ኤንታ ማርካቴላይ ሄሳንካ ኢሲና ጊዴና።

60 ካሂኔ ሃላቃይ አሳ ኡባ ሲንፋን ዳንዲ ኤቁዲ፡ «ሃይሳቲ ኔና ሞቲያ ሞቱዋሰ ኔ ዛሪያባይ ባዌ?» ያጊዲ ዬሱሳ ኦይቸሰ።

61 ሺን ዬሱሲ ሲዲ ገሰ፤ አይኮካ ዛሪቤና። ካሂኔ ሃላቃይ፡ «አንጃቲዳ ያሳ ናዓይ፡ ኪሪሰቶሲ ኔኔዬ?» ያጊዲ ዛሪ ኦይቸሰ።

62 ዬሱሲ ዛሪዲ፡ «ኤ ታና፡ ሂንቴ አሳ ናዓይ፡ ዋልቃማ ያሳፊ ኡሻቻ ባጋራ ኡቲዳሺን ቃሲ ሳሉዋ ሻራራ ዩሺን ቤዓና» ያጊሰ።

63 ካሂኔ ሃላቃይ ባ ማዑዋ ፔዲዲ፡ «ኦና ሃራ ማርካ አይ ኮሺ? 64 ሂንቴ ኢያ ጫሻ ሲዲዳታ፤ ሂንቴ ቆፋይ አይቤ?» ያጊሰ። ኤንቲ ኡባይ፡ «ኢ ሃይቃናው ቤሰሰ» ያጊዲ ኢያ ቦላ ፐርዲደሶና።

65 ኤንታፊ ኢሶቲ ኢሶቲ ኢያ ቦላ ጩቴላ ኦይኪደሶና። ኢያ አይፊያ ጎዚዲ ባቂሼ፡ «ኔና ዳቸዳይ ኦኔ? አኔ ኮሰ ኦዳ!» ያጊደሶና። ናጌይሳቲ ኢያ ኤኪ ኤፊዲ ጋራፊደሶና።

ጳጳርሲ ዬሱሳ ካዲሰ

(ማቶ 26:69-75፤ ሉቃ 22:56-62፤ ዮሃ 18:15-18፤ 25-27)

66 ጳጳርሲ ካሂኔ ሃላቃ ዛባን ጋርሳ ባጋራ ዳዒሺን፡ ካሂኔ ሃላቃ ማጫ አይሌታፔ ኢሲኒያ ያ ያሱ። 67 ጳጳርሲ ታማ ካዬይሳ ቤዓዳ፡ ቲሺ ኦፋ ፆላዳ፡ «ኔኒካ ናዚሬቴ ዬሱሳራ ዳዓሳ» ያጋሱ።

68 ሺን ጳጳርሲ፡ «ኔ ጌይሲ አይቤኮ ታ ኤሪኬ፡ ታው አኬኬቴና» ያጊዲ ካዲሰ። ያጊ ሲሚዲ ዛጎ ኬያ ዋዴ ሶሁዋራ ኩቶይ ዋሲሰ።

69 ሄ አይሊያ ጳጳርሳ ቤዓዳ፡ ኢያ ማታን ኤቁዳ አሳታኮ፡ «ሃ ኡራይካ ኤንታራ ዳዔሰ» ጋዳ ዛራ ኦዳሱ። 70 ሺን ጳጳርሲ ቃሲካ ካዲሰ።

ጉላ ጋምዒሺን፡ ማታን ኤቁዳ አሳቲ ናምዓን፡ ጳጳርሳኮ፡ «ኔኒ ጋሊላ ቢታ አሲ ጊዲያ ጊሾ ቱማ ኤንታራ ዳዓሳ» ያጊደሶና።

71 ሺን ጳጳርሲ፡ «ታኒ ሂንቴ ጊያ ኡራ ኤሪኬ!» ያጊዲ ባና ቃንጌላኔ ጫቆ ኦይኪሰ።

72 ሶሁዋራ ኩቶይ ናምዓን፡ ዋሲ አጊሰ። ጳጳርሲ ዬሱሲ ኢያኮ፡ «ኔኒ ኩቶይ ናምዑ ቶሆ ዋሳናፔ ሲንፍ ሄሹ ቶሆ ታና ካዳና» ኢያኮ ጊዳይሳ አኬኪዲ ዳር ዬኪሰ።

# 15

ዩሱፍ ጲላዎሳኮ ኤፊደሶና

(ማቶ 27:1-2፣ 11-14፤ ሉቃ 23:1-5፤ ዮሃ 18:28-38)

1 ዋንታ ጉራ ኤሌሲዲ ካሂኔ ሃላቃቲ፣ ጨማቲ፣ ሂጌ አስታማሬቲኔ አይሁዳ ሻንጎቲ ኡባይ ሸቂዲ ማቄቲደሶና። ኤንቲ ዩሱፍ ቃቺ ኤፊዲ ጲላዎሳኮ አሉ ኢሚደሶና።

2 ጲላዎሲ ኢያኮ፣ «ኔኒ አይሁዳታ ካዎ?» ያጊዲ ኦይቺሰ።

ዩሱሲ ዛሪዲ፣ «ኔ ጋዳሳ» ያጊሰ።

3 ካሂኔ ሃላቃቲ ዩሱፍ ዳሮባን ሞቲደሶና። 4 ሺን ጲላዎሲ ዛሪዲ ዩሱፍኮ፣ «ኔው ዛሪያባይ ባዎ? ኤንቲ ኔ ቦላ አይ ማላ ሞቱዎ ኤሂያኮ ቤዒኪ?» ያጊሰ።

5 ሺን ዩሱሲ ሃራባ ዛርና ኢዪን፣ ጲላዎሲ ማላሉቲሰ።

ዩሱፍ ሃይቆ ጊዲ ፒርዲደሶና

(ማቶ 27:15-26፤ ሉቃ 23:13-25፤ ዮሃ 18:39-40፤ 19:1-

16)

6 ጲላዎሳኮ ፓሲካ ባሌ ቦንቺያ ጋላሳን አሳይ ኮያ ኢሲ ኡራ ቃሾፕ ቢሊያ ማዜይ ዴዔሰ። 7 ሄ ዎዴ ኢሲ ባርባና ጊያ ኡራይ ኦቩ ኬሲዲ ሸምፖ ዎቋዳ አሳታራ ኢሲፌ ቃሾ ኬላን ዴዔሰ። 8 ሸቂዳ ዳር አሳይ ጲላዎሲ ካሴይሳዳ ኦላና ማላ ኢያ ኦይቺደሶና። 9 ጲላዎሲ አሳ ዛሪዲ፣ «ታኒ ሂንቴው አይሁዳታ ካጧዎ ቢላናይሳ ኮዩቲ?» ያጊዲ ኦይቺሰ። 10 ሄሳ ኢ ጊዳይ፣ ካሂኔ ሃላቃቲ ዩሱፍ ቃናቲዲ አሉ ኢሚደይሳ ኤሪያ ጊሾሳ።

11 ሺን ካሂኔ ሃላቃቲ ዩሱፍ ጊሾ ባርባና ቢላናዳ፣ ሄ ሸቂዳ አሳይ ጲላዎሳ ዎሳና ማላ አሳ ማቂደሶና። 12 ጲላዎሲ ዛሪዲ፣ «ያቲን፣ ሃ ሂንቴ አይሁዳ ካዎ ጌይሳ ዎቶ?» ያጊሰ።

13 አሳይ ጲላዎሳ ቦላ ዋሲዲ፣ «ማሰቃሊያ ቦላ ኢያ ካቃ» ያጊደሶና።

14 ጲላዎሲ አሳኮ፣ «አይሰ? ኢ አይ ኢታባ ኦሉዴ?» ያጊሰ።

ሺን አሳይ ካሴይሳፌ ጉጂ ዋሲዲ፣ «ማሰቃሊያ ቦላ ኢያ ካቃ» ያጊደሶና።

15 ጲላዎሲ አሳ ኡፋይሳናው ኮዪዲ፣ ባርባና አሳሰ ቢሊሰ፤ ያቲዲ ሊሶን ዩሱፍ ጋራፊዲ፣ ማሰቃሊያ ቦላ ካቃና ማላ ኤንታው አሉ ኢሚሰ።

ዎታዳሬቲ ዩሱፍ ቶቺደሶና

(ማቶ 27:27-31፤ ዮሃ 19:2-3)

16 ሄሳፌ ጉዬ፣ ዋታዳሬቲ ዬሱሳ ዳሪያ ሃሪይሳ ኦሶ ኬላ ኤኪ ኤፊዲ፣ ሃሪ ዋታዳሬታ ኡባ ኢሲፌ ጃጊደሶና። 17 ቃሲ ዘዎ አፊላ ኢያ ማይዚደሶና፤ አጉንሳ ካላቻ ገገሲዲ፣ ኢያ ሁዒን ዋሊደሶና። 18 ሄሳፌ ጉዬ፣ ኢያኮ፣ «አይሁዳታ ካዉዋው ሚሪናው ካዎታ» ያገዲ፣ ኢያው ዘገጊደሶና። 19 ኢያ ሁዒያ ፃምዓን ሾጪደሶና፤ ቃሲ ኢያ ቦላ ጩቲደሶና፤ ጉልባቲዲ ኢያው ጎይኒደሶና። 20 ኢያ ቶቹዳይሳፌ ጉዬ ዘዎ አፊላ ኢያ፤ ቃሪ ኤኪዲ፣ ኢያ አፊላ ኢያ ማይዚዲ ማስቃሊያ ቦላ ኢያ ካቃናው ኤኪ ኤፊደሶና።

**ዬሱሳ ካቂደሶና**

(ማቶ 27:32-44፤ ሉቃ 23:26-43፤ ዮሃ 19:17-27)

21 ኤንቲ ቢሼ፣ ኢስኪንዲሬኔ ሩፎሳ አዋ፣ ሲሞና ጊያ ቄሬና ቢታ አሲ፣ ጋፃሬፔ ካታማ ዬይሳራ ጋሄቲዲ፣ ዬሱሳ ማስቃሊያ ዋልቃን ቶሲደሶና። 22 ያቲዲ ጎልጎታ ጊያ ቤሳ ዬሱሳ ኤፊደሶና። «ጎልጎታ» ጉሳይ «ሁዒ ጉጌ» ጉሱ። 23 ሳኮይ ሲዔቶና ማላ ካርቤ ጊያ ጳሌይ ዋላኬቲዳ ዋይኔ ኡዮ ጊዲ ኢያው ኢሚደሶና። ሺን ኢ ኡዮና ኢዲስ። 24 ኤንቲ ማስቃሊያ ቦላ ኢያ ካቂደሶና። ኦና አይቤ ጋካኔኮ ጊዲ ኢያ አፊላ ሻኪዲ ሳማ ዬጊደሶና።

25 ኤንቲ ማስቃሊያ ቦላ ኢያ ካቂያ ዋዴ ዋንታፌ ሄቭ ሳቴ። 26 ኤንቲ፣ «አይሁዳታ ካዉዋ» ያገዲ ኢያ ሞቲያ ፀፌ ፃፊዲ ዋሊደሶና። 27 ዬሱሳራ ናምዑ ፓንጋታ ኢሱዋ ኢያ፤ ኡቫቻ ባጋራ ሃንኩዋ ኢያ፤ ሃዲርሳ ባጋራ ማስቃሊያ ቦላ ካቂደሶና። 28 ጌሻ ማፃፋይ፣ «ኢታባ ኦሊዳ አሳታራ ኢ ፓይዳቲስ» ጌቲቲዳይሲ ፖሌቲስ።

29 ኦጊያራ አዲያ አሳይ ዬሱሳ ካዲዲ፣ ባንታ ሁዒያ ቃሊዲ ጫዩደሶና፤ «ሄኮ! ያሳ ኬላ ላላዳ ሄቭ ጋላሳ ጊደን ኬፃይሶ፣ ኔ ሁዒያ አሻ፤ 30 ኣኔ ማስቃሊያ ቦላፌ ዋዳ» ያገደሶና።

31 ሄሳዳካ፣ ካሂኔ ሃላቃቲ ሂጊያ ታማርሴይሳታራ ኢሲፌ ዬሱሳ ቶቹዲ፣ «ሃራታ አሺስ፣ ሺን ባና አሻናው ዳንዳዳና፤ 32 ኦኒ ቤዒዲ አማናና ማላ ኪሪስቶሲ፣ ኢስራዔሌ ካዋይ፣ ኣኔ ማስቃሊያ ቦላፌ ሃዒ ዋዳ» ያገደሶና። ቃሲ ሃሪ ኣቶሺን፣ ኢያራ ማስቃሊያ ቦላ ካቂቲዳይሳቲካ ኢያ ቶቹደሶና።

**ዬሱሲ ሃይቂስ**

(ማቶ 27:45-56፤ ሉቃ 23:44-49፤ ዮሃ 19:28-30)

---

15:21 ሮሜ 16:13    15:28 ኢሳ 53:12    15:29 ማዝ 22:7፤ 109:25፤ ማር 14:58፤ ዮሃ 2:19

33 ኡሱፑን ሳቴፔ ደሚዲ፣ ኡዲፋን ሳቴ ጋካናው ቢታ ኡባይ ጰሚሰ። 34 ኡዲፋን ሳቴያን ዬሱሲ ባ ቃላ ጰቁ ኦሊዲ፣ «ኤሎሄ፣ ኤሎሄ፣ ለማ ሳባቂታኒ?» ያገሰ። ሄሳ ጉሳይ፣ «ታ ያሳው፣ ታ ያሳው፣ ታና ኣይሰ ኣገዲ?» ጉሱ።

35 ሄሳን ኤቂዳ ኣሳፔ ኢሶይ ኢሶይ ሄሳ ሲዒዲ፣ «ሄኮ፣ ኤሊያሳ ፍጌስ» ያገሰ። 36 ሄ ኣሳፔ ኢሶይ ዋዒዲ፣ ኢሰፖንጂን ጫላ ዋይኔ ኩንሊስ፤ ሄሳ ፃምዓ ፃራን ዋሊዲ፣ «ናጊቴ፤ ኤሊያሲ ማሰቃሊያፔ ኢያ ዋዲሳናው ያኔኮ ኣኔ ቤዖስ» ያገዲ ዬሱሳ ደናኮ ኡሻናው ሺሺሰ።

37 ዬሱሲ ባ ቃላ ጰቁ ኦሊ ዋሲዲ፣ ሃይቂስ።

38 ያሳ ከላን ካቂቲዳ ማጋራጃይ ቆሞፌ ደጌ ጋካናው፣ ናምዑ ከዪዲ ዳኬቲ ዋዲሰ። 39 ማሰቃሊያፔ ስንላ ባጋራ ያን ኤቂዳ ኢሲ ማቶ ሃላቃይ፣ ዬሱሲ ዋኒዲ ሃይቂዳኮ ቤዒዳ ዋዴ «ሃ ኡራይ ቱማ ያሳ ናዓ» ያገሰ።

40 ሄሳ ሃሆን ኤቂዲ ቤዒያ ጉላ ማጫሳቲ ዴዖሶና። ኤንታ ጊደን ማግዴላ ማይራማ፣ ካሉዋ ያይቆባኔ ዮሳ ኣያ ማይራማኔ ሳሎማ ዴዖሶና። 41 ሄ ማጫ ኣሳቲ ዬሱሲ ጋሊላን ዴዒያ ዋዴ ኢያ ካሊዳይሳታኔ ኢያ ሞቢዳይሳታ ቃሲ ዬሱሳራ ኢሲፌ ዬራሳላማ ቢዳ ሃራ ደር ማጫ ኣሳቲ ያን ዴዖሶና።

**ዬሱሲ ሞጌቲስ**  
(ማቶ 27:57-61፤ ሉቃ 23:50-56፤ ዮሃ 19:38-42)

42-43 ሳዓይ ኦማርሲዳ ዋዴ ሺቂዳ ኣሳን ቦንቹቲዳ ኣይሁዴ ሻንሳታፔ ኢሶይ፣ ዮሴፋ ጊያ ኡራይ፣ ያሳ ካዎቴላይ ያናይሳ ናጊሼ ዴዒይሲ፣ ኣርማቲያሳ ካታማ ኣሲ ዴዒይሲ ዪሰ። ዋንቴሉ ሳምባታስ ጊጌቲያ ጋላስ ጊዲዳ ጊሾ ዮሴፌ ሚኒዲ ጰላዖሳኮ ቢዲ፣ ዬሱሳ ኣሃ ኤካናው ዋሲሰ። 44 ጰላዖሲ ዬሱሲ ሃይቂዳይሳ ሲዒዳ ዋዴ ማላሌቲስ፤ ማቶ ሃላቃ ፍጊዲ፣ «ኢ ሃይቂዲ ጋምዒዴ?» ያገዲ ኦይቹስ። 45 ጰላዖሲ ዬሱሲ ሃይቂዳይሳ ማቶ ሃላቃፔ ሲዒዲ ኢያ ኣሃ ዮሴፋስ ኢሚስ። 46 ዮሴፌ ሞሳ ኣፊላ ሻሚስ፤ ዬሱሳ ኣሃ ማሰቃሊያፔ ዋሊዲ፣ ኣፊላን ፃዒዲ፣ ሹቻፌ ዋጩቲዳ ደፎ ጊደን ኢያ ኣሃ ሞጊስ። ቃሲ ሄ ዲፋዎ ደናን ጊታ ሹቹ ጎንደርሲዲ ዋሊሰ። 47 ማግዴላ ማይራማኔ ዮሳ ኣያ ማይራማ ዬሱሳ ኣሃ ኤንቲ ኣጫን ዋሊያኮ ቤዖሶና።

---

15:34 ማዘ 22:1    15:36 ማዘ 69:21    15:38 ኩሳ 26:31    15:41 ሉቃ 8:2-3

# 16

ዩሱሲ ሃይቆፔ ዳንዲስ

(ማቶ 28:1-8፤ ሉቃ 24:1-12፤ ዮሃ 20:1-10)

1 ሳሞባታይ አጂዳፔ ጉዬ ማግዳላ ማይራማ፣ ያይቆባ አያ ማይራማኔ ሳሎማ ቢዲ፣ ዩሱሳ አሃ ቲያናው ሺቶ ሻሚደሶና።

2 ዋጋ ዋዴ ዋንታ ዳሮ ጉራ ፃልቄይ ጨርሸን፣ ዲፋዋ ቢደሶና።

3 ኤንቲ ባንታ ጊደን ኢሶይ ኢሱዋራ፣ «ዲፋዋ ደናፔ ኮስ ሹቻ ኦኔ ጎንደርሲዲ ዲጋናይ?» ያጊዲ ኦዴቲደሶና።

4 ኤንቲ ፃሊያ ዋዴ ሄ ዳሮ ገታ ሹቻይ ጎንደራቲዲ ከቺዳይሳ ቤዲደሶና። 5 ዩሱሲ ሞጌቲዳ ዲፋዋ ጊደ ጌሊያ ዋዴ ኢሲ ፓንሳ አዳይ ቦላ ማዖ ማዲዲ፣ ኡሻቻ ባጋራ ኡቲዳይሳ ቤዲዲ ዳጋሚደሶና።

6 ሺን ኢ ኤንታኮ፣ «ዳጋሞፊቲ፤ ማስቃሊያ ቦላ ካቄቲዳ፣ ናዚሬቲ ዩሱሳ ሂንቲ ኮዬይሳ ታኒ ኤራይስ። ኢ ሃይሳን ዳና፣ ሃይቆፔ ዳንዲስ። ኤንቲ ኢያ ሞጊዳ ቤሳ ሃይሳ ቤዲቲ። 7 ሃዲ ቢዲ ዩሱሳ ታማሬታሲኔ ጳዊርሳስ፣ «ዩሱሲ ሂንቲፊ ሲንሳቲዲ ጋሊላ ቤስ። ኢ ሂንቲው ኦዲዳይሳዳ ሂንቲ ኢያ ያን ቤዳና» ያጊዲ ኦዲቲ» ያጊሰ።

8 ማጫሳቲ ያሻን ኮኮሪሽ ዲፋዋፔ ከዪዲ ባቃቲደሶና። ቃሲ ኤንቲ ያዪዳ ጊሾ ሄሳ ኦዴስካ አይኮካ ኦዲቦኮና። \*

ዩሱሲ ማግዳላ ማይራሚስ ቤንቲስ

(ማቶ 28:9-10፤ ዮሃ 20:11-18)

9 ዩሱሲ ሃይቆፔ ዳንዲዳፔ ጉዬ ዋጋ ጋላስ ዋንታ፣ ላፑን ቱና አያናታ ከሲዳ ማግዳላ ማይራሚስ ኮይሮቲዲ ቤንቲስ። 10 ኢያ ባዳ ካሴ ኢያራ ዳዔይሳታስ፣ ኤንቲ አዛኒሼኔ ዩኪሽ ዳዲሺን ኦዲሱ። 11 ሺን ዩሱሲ ፓፃ ዳዔይሳኔ ኢው ቤንቲዳይሳ ኤንቲ ሲዲዳ ዋዴ ኢያ ጌይሳ አማኒቦኮና።

ዩሱሲ ናሞው ባ ታማሬታስ ቤንቲስ

(ሉቃ 24:13-35)

16:7 ማቶ 26:32፤ ማር 14:28 \* 16:8 ኢሲ ኢሲ ቤኒ ማፃፋቲ ማርቆስ ዋንጌላ ፓይዶ 8 ቦላ ኡሶሶና። ቃሲ ኢሲ ኢሲ ማፃፋቲ ፓይዶ 9-20 ጋካናው ዳዲያ ቆፋ ጉጃሮና። ጊደሺን፣ ፓይዶ 8 ካሊዲ ዳዲያ ጉጃሮና። ሄሲካ [ማጫሳቲ ቢዲ፣ ከታንቸይ ኦዲዳባ ኡባ ጳዊርሳስኔ ኢያራ ዳዔይሳታስ ቃንሳን ኦዲደሶና። ሄሳሬ ጉዬ፣ ዩሱሲ ባ ታማሬታ ጌሽኔ ሜሪና አቶቲላ ዋንጌላ ከታ ደሎሃፔ ወሎሃ ጋካናው ከቲስ።]

12 ሄሳፌ ጉዬ፣ ኤንታፌ ናምዓቲ ካታማፔ ኬዬዲ ቢሺን፣ ኦጌ ቦላ ዩሱሲ ካሴይሳፌ ዲማቲዲ ኤንታው ቤንቲሰ። 13 ኤንቲ ጉዬ ሲሚዲ፣ ሃራታሰ ኦዲደሶና፣ ሺን ሃራቲካ ኤንታ ኦዲ ቱማ ጊቦኮና።

ዩሱሲ ታማኔ ኢሲ ባ ታማሬታሰ ቤንቲሰ  
(ማቶ 28:16-20፤ ሉቃ 24:36-49፤ ዮሃ 20:19-23፤ ሃ.ኦ

1:6-8)

14 ጉዬፔ ታማኔ ኢሲ ኢያ ታማሬቲ ካሌ ሚሺን፣ ዩሱሲ ኤንታው ቤንቲሰ። ኤንታው ኣማኖይ ባይና ጊሾኔ ሃይቆፔ ኢ ዴንዲዳይሳ ቤዒዳ ኣሳይ ኦዲን ኤንቲ ኣማኖና ኢዲዳ ጊሾ ኢ ኤንታ ቦሪሰ።

15 ኢ ኤንታኮ፣ «ቢታ ኡባ ቢዲ ኣሳ ኡባሰ ዋንጌላ ኦዲቴ።

16 ኣማኔይኔ ፃማቄቴይ ኣታና፣ ሺን ኣማኖናይ ፒርዴታና።

17 ኣማኔይሳታሰ ሃ ማላታቲ ኢሜታና። ኤንቲ ታ ሱንሳን ቱና ኣያናታ ኬሳና፣ ኦራላ ደናን ኦዴታና። 18 ኤንቲ ሾሹ ኦይኪኮካ ዋይኮ ዋዲያባ ኡዩኮካ ኤንታ ቆሄና። ቃሲ ኤንቲ ባንታ ኩሺያ ሃርጋንቾታ ቦላ ዋሒዲ ኤንታ ፓላና» ያገሰ።

ዩሱሲ ፑዴ ሳሎ ኬዩሰ

(ሉቃ 24:50-53፤ ሃ.ኦ 1:9-11)

19 ጎዳይ ዩሱሲ ታማሬታራ ኦዴቲዳፔ ጉዬ ፑዴ ሳሎ ኬዩሰ፤ ያሳፌ ኡሻቻ ባጋራ ኡቲሰ። 20 ኢያ ታማሬቲ ቢዳሶ ኡባን ቃላ ኦዲደሶና። ጎዳይካ ኤንታራ ኢሲፌ ኦሌሰ። ኤንቲ ኦዲያ ቃላይ ቱማ ጊዲዳይሳ ያሳይ ኤንታው ኢሚያ ማላታታን ኤሪሲሰ።

**ኦሎሳ ጩቂዋ ኅፋሶ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-25

---

PDF generated using Haiola and XeLaTeX on 11 Nov 2022 from source  
files dated 29 Jan 2022

c35d6c73-3843-5482-b53e-7559d35deee5